

# WAHALA A MAKHALELO AKA



Nrowe nuuramihe miru sahu okathi vakhani paahi wira nivekele.

Tith'ihu ooreera murima a Wirimu, vekeekhai ola mureerelo orin'ahu wo owaattamelani Nyuwo, Muluku ahu ni Moopoli. Niiwaka esipo ela yooreerexa, *Muulupalexa Ti Nyuwo*, eyo enninivara murima okhala wira hiyo ninnisuwela wira Nyuwo mwa muulupale. Ni hiyo ninvekela wira eyuulupale Anyu yoonihereye-tho wa hiyo, oxekuw'ola, okathi onlavul'ahu. Ni vaahikireerela, emara yoopacerya mwa miyakha sinci-ene, othuna otthikela ovira wa makhalelo, ni kinvekela wira Nyuwo mukivahe ikuru ni—ni etthu entthun'aka, Pwiya, wira kikhale okathi ula. Ni wira ivonyeryo saka sothene mwa makhalelo w'akina sikhale paahi nluku n'ovira vasulu vaya, nenlo naarowa waaruuha vakhiviruxa ni Nyuwo. Munivahe, Pwiya. Wira anatampi yoone maravulo vamithaakani sa okathi, ni wira awo yeettiheriwe wa Nyuwo. Itthu iya hiyo ninvekela mwa Nsina na Pwiya Yesu. Amen.

Mukilaathiki.

<sup>2</sup> [Munna Glover oniira, “Vaaniweryaneya ovekelela maleso ala muhinatthi opacerya?”—Mol.] Kinootthapela. [“Aakhala *ale* ni *ala* wira avekeleliwe.”] Vaareera, mulopwana, kooxukhuru. Ntoko mulopwan'ola ooreera murima, Munna Glover, kinimusuwel'aka vano mwa miyakha kamosa kamosa, kaahikhalana mureerelo w'okhala ni yoowo vakhani nsana ohiyu. Nto owo ookileela wira...owo okilenle wira aarimoorowa vakhani, amumulaka. Nto vano, mwa miyakha miloko mithanu na miili ni mithanu, nootthikela mmuttekoni mw'Apwiya. Miyo nkikhulumunwe hata nusu ntoko saary'aka kihinatthi wiiwa eyo. Miyo koono wira kaahikhulumuwa, masi miyo—miyo nkinkupali wira kookhulumuwa. Owo enoomalaru okinnya va maleso kamosa kamosa, mwa e—enamuna wa iviloopi, ni sikina, memmo siri-aya muhina ni soowaleliwa.

<sup>3</sup> Vano, khula mmosa a nyuwo munimphiyerya raatiyu, wala va, muntthuna nimosa wa maleso ala, ni mwaatthuna... Empa Angelus enniveleeliha voohihayererya, khula okathi. Mwaamuwerya olepela vaava Empa Angelus nto awo anoovekelela, okhala wira miyo kinnoolipiheryani wira eyo ti Yoolempwa. Owo natiri a Muluku.

<sup>4</sup> Nto vakhala wira nyuwo mwaamutthuna wira miyo kivekelele nimosa wa nyuwo, vano, miyo kinootthapela wira yeeyo. Nyuwo mukilepele paahi ekaaxa postale 3-2-5, 325, Jeffersonville, enlempwa J-e-f-f-e-r-s-o-n-v-i, 1 piili, e. Jeffersonville, Indiana. Wala mwaahiwerye wuupuwela

ekaaxa postale, mulepe paahi “Jeffersonville.” Eyo epooma yaamukhaani, atthu oophiyaka ikonto miloko miraru ni mithanu. Atthu othene annikisuwela iwe. Nto siiso hiyo naamukhala ootthapela ovekelela nleso ni wooveleliheryani.

<sup>5</sup> Nto, vano, hiyo ninnittottelaka muraarelo muulupale niiraka yeela, okhala wira . . . Nyuwo munimwaakhela epaphelo ni nleso, wira atthu mulaponi mothene annivekela khula voosiisu ewoora yaneethanu na xexe, ni ewoora yanamuloko ni piili ni ya neeraru. Vano nyuwo pooti otthokelela, ottuli wa olumwenku wothene, okathi xeeni w’ohiyu atthu arin’aya ovenya ni wira nivekelo nla. Vano vakhala wira ikonto miloko sene iya, imara ikonto sene, anvelela mavekelo wa Muluku okathi ene yoowo mmosaru mwaha wa muteko ola, iretta sanyu, Muluku khokhanle ookhoota pahi. Nto siiso hiyo, ntoko sinihimy’aka, hiyo khanrina hata itthokiheryo, hiyo khaninthuna hata esentavo ya musurukhu. Hiyo nri paahi . . . Nawerya vale wookhaliheryani, ti yeeyo ekhalenly’ahu va. Ni ninrowa . . .

Ookhala oniruuha nikuttha nikina na maleso.

<sup>6</sup> Vano, nyuwo mwaahikhalane nleso mwaatthun’anyu oveleeliha, vaareera, vano nyuwo mulepe paahi, khula enamuna. Nyuwo mwaahitthuneke naanaano va, mpwehe muLiivuruni mwa Miteko, mBibiliani, kapitulu 19. Nto enrowa okhala muthinto w’ekhlulula yaamukhaani enrow’anyu oveleeliheriwa, ni wiixuttihiwa moota w’olapa itampi sanyu toko. Ni (kooxukhuru) moota w’olapa itampi sanyu. Nyuwo muheereryeke nnakhala ophwanya etthu wa Muluku muhitonko opacerya okhala sana ni Muluku. Munnona? Nto vo nyuwo mwa yeeyo nyuwo muri owiixuttihiwa wira muwiihane anamwaattamanan’inyu, ni pastore anyu. Nyuwo mwaarineene etthu eri mmurimani mwananyu ya nthowa ni mutthu, murowe mwalokiherye toko, nto mutthike. Nto vo nvekele, mukhalane muthukumano wa mavekelo owannyinyu, nto muttopaanerye nleso nla n’alufineti vakuwoni vanyu ya muhina, vano mmwaamini Muluku. Nto iwoora sene seiyo tthaaru, khula nihiku, anookhala atthu mulaponi mothene avekelaka, ekwirinti molumwenkuni mothene.

<sup>7</sup> Nto vano eyo ti yawinyu, mahala-ene vekeekhai, nveleelihe paahi. Nto—nto, vano, hiyo khaninrowa okhala noolepelakani wira noonyoonyiheni wala woohimeeryani etthokiheryo hiyo erin’ahu. Hiyo ninthuna wira nyuwo mukhaliherye etthokiheryo ya muteko, masi hiyo khan—khanrina hata mmosa wira mukhaliherye. Munnona? Vano nyuwo . . . Kahi wira nikhalane opuro anyu, eyo otthuna vasana-vene paahi ni muteko w’Apwiya, hiyo onthun’ahu okelela ohoolo.

<sup>8</sup> Vano nrowe nuuramihe miru sahu. Nto nyuwo mwaarina-ene raatiyu, muhele nleso nanyu vaavo, muhelele ntata nanyu vaavo paahi okathi onvekel’ahu.

<sup>9</sup> Pwiya oomoriwa Ikharari, hiyo ninniruuha wa Nyuwo mahuta ala makhaani, alakela makina wa yaawo anikhala ntoko ikuwo sikhaani sa mwaana, wala—wala ikamiseeti saamukhaani, wala alakela ipoota piili sikhaani, wala—wala etthu, nleso, sinrowa wa mureta ni ooriipiwa murima. Pwiya, eyo entthariha Masu Anyu hiyo nniir’ahu yeela. Maana hiyo noosoma, muLiivuruni mwa Miteko, wira yaanikuxiwa v’erutthuni va murumeyi Anyu, Paulo, maleso ni ikuwo, okhala wira awo yaanaamini wira Eroho Anyu yaari mwa mulopwan’owo. Ni irooho sootakhala saanaahiya atthu, ni mixankiho ni iretta saanaahiya, okhala wira awo yaanaamini. Nto vano hiyo ninnisuwela, Pwiya, wira hiyo khanihiyo Paulo Oowaarya, masi noosuwela wira Nyuwo nlelo mwa Yesu. Ni ninvekela wira Nyuwo muttittimihe waamini w’atthu ala.

<sup>10</sup> Ni yoohimmwa emara emosa wira okathi Isarayeli, atthunaka omwiiwelela Muluku, yaahivariwa vantaphani, ephareya ohoolo waya, miyaako wa khula epantte, ni anakhotto a Farawo yaattamelaka. Nto ookhala ohimnye, wira “Muluku aarooweha vathi mwa Nlumi nle na Moro, ni maitho ooviruwa, nto ephareya khututhuwa khurukunuwela ottuli mmansaya, khupaka ephiro wa Isarayeli wira alapuwele muttethe wa natiri.”

<sup>11</sup> O Pwiya, nwehe tho vathi, okathi mahuta ala aniixatheriw’aya irutthu sinwereiwa vootthapela Masu Anyu makumi. Ni wira eretta etuthuwe, nwehe mwa Ephome ya Mwan’Inyu, Yesu, Yoowo okhwenle elivelo ela. Ni wira nwanani atuthuwe ni arowe, wira atthu ala ewerye okela muhina mwa natiri, wira “Vasulu va itthu sothene,” wira ti otthuna Wanyu “wira hiyo nikhaleke sana mw’ekumi.” Munivahe, Tithi, maana hiyo ninveleeliha ni yoowo—ni mukhalelo yoowo mmurimani mwahu. Ni eyo ti etthunelo ahu. Hiyo ninveleeliha mwa Nsina na Yesu Kristu. Amen.

Kooxukhuru, Munna Glover. Kooxukhuru, mulopwana.

<sup>12</sup> Vano, ohiy’ula okhanly’aya ekiseryo wa mpantta ola wa muhakalaliho, miyo nkisuwenle sinto onookhala wookumiheriwa muraatiyuni wala nnari, masi kaatthuna kihimye wira (waahikhale) w’ale aniiwa muraatiyuni, wira ola onikhala mmosa wa mithukumano sooreerexa otonko aka okhalana mwa miyakha, miyakha sene. Onikhala woolipa, woomalela, muthukumano wa mphento, wo wiiwanana otonko aka okhala—mo mwa okathi munci-ene.

<sup>13</sup> [Munna mmosa oniira, “Hiyo nri musulu mpakha ewoora ya neexexe ni minutu muloko ni thanu, munna. Ni awo annoowiriyani, oCalifornia w’okuusini wothene, musisironi wu mothene, ni mupaketini. Hiyo nihaakhela mihupi saya. Nto murina muttitti muulupale, ikonto ni ikonto miloko

sene.”—Mol.] Kooxukhuru, mulopwana. Eyo ti yooreera sana. Kinnithapela wiiwa yeeyo. Muluku ooreeriheni nyuwo othene.

<sup>14</sup> Nto vekeekhai miyo okathi wothene kinnikhalanaka nipuro noohakalala mmurimani mwaka mwaha wa Empa Angelus, mwaha wa mweemereryo aya mwaha Ehapari yooreera yoomalela ya Yesu Kristu. Ni, vano, eni—enikhala ntoko ya mmansaka yoomi vano. Enikhala ntoko, numala okumanana atthu othene ni woona irooho saya sooreera murima, kinikhala ntoko ka mmosa a nyuwo ovikana saakhalak’aka. Muluku ooreeriheni, ti mavekelo aka. Ni... [Muthukumano onopa ikuphi—Mol.] Kooxukhuru, vaalupale.

<sup>15</sup> Vano, yoohimmwa wira olelo kaari wira kooleleni vakhani mwaha wa: *Wahala A Makhalelo Aka*. Eyo e—ethu yookirikela miyo. Ela enrowa okhala emara yoopacerya kineerery’aka omwaattamela mwa miyakha sinci-ene. Ni nkaarowa okhalana okathi woohimaxexa, masi epantte ya yeeyo paahi. Nto, mu, miyo koovonya vanci-ene, kihiira itthu sinci-ene saari soovonyeya. Ni kinrowa otthuna wira, nyuwo muniwa muraatiyuni wala nyuwo muri vaava, muhikuxe soovonya saka wira sikhale maluku owookwattulani, masi maluku oovira—mo wira yooruheni vakhiviru v’Apwiya Yesu.

<sup>16</sup> Nto, ohiy’ula, ittikitti sa mavekelo siri wira sikaiwe wa muteko w’ovoniha ohiy’ula. Vano, naalavulaka mwaha wa *muteko w’ovoniha*, khenihimya wira hiyo ninrowa omuvoniha mutthu, hiyo ninrowa “omuvekelela mutthu.” Muluku t’ovoniha. Owo onnikhalaka ookimorela ikharari vanci-ene miyo, mwaha wo waakhulaka mavekelo.

<sup>17</sup> Nto miyo kaalavula ni mukhulupale a namalaleya mmosa oosuweliwa, va okathi vakhani ovinre, ni—ni yaarookohiwa mwaha wa xeni namalaley’ola ahaavekelel’awe aretta. Nto namalaleya khimwaakhula mu—mukhulupale a mithukumano saka, khwira, “Vakhala wira...” Namalaley’ola onnaamini ovoniha wa Muluku. Masi owo aapacenrye—ru waavekelela aretta, waamukhweliha muteko awe okhala wira owo onikhaliheriwa ni ikereja. Ikereja sinci-ene, ni sinci-ene saya, khasinaamini ovoniha wa Muluku.

<sup>18</sup> Vano miyo kookhalana nlemeliho ni nttittimiho wa namalaley’owo okhala wira onikhapelela nipuro nawe, opuro awe wa muteko. Owo aamuwerya khino... Miyo nkaakhalakhala kiweryaka okhala nipuro nawe, ni nkinkupali sinto owo aamuwerya okhala nipuro naka. Hiyo othene nookhalana nipuro Moomweneni mwa Muluku. Hiyo othene nitakanxiwe vamosa. Soovaha soovirikana, masi Eroho emosaru. Kaatthuna wira, iyooniheryo soovirikana, masi Eroho emosaru.

<sup>19</sup> Nto, vano, ohiy’ula miteko sinrowa opacerya... Miyo kinoona wira awo ahimmye wira muteko wa isipo onipacerya ewoora ya neethanu na mosa ni minutu miloko miraru. Nto,

vano, nyuwo mwaari-ene vakhiviru va raatiyu, murwe nwiriyane ola. Ti . . . Onookhala wooreera, kweekwe ene ti siiso.

<sup>20</sup> Nto vo kintthuna kihimye wira ittikitti sa mavekelo sinookaiwa naanaanoru numala mutek'ola, naanaanoru mutek'ola omalihiwakaru, nyuwo mwaari-ene vaava ni munatthuna ettikitti ya mavekelo. Miyo kihiiixuttihiwa mpaani mme okathi vakhani ovinre, mwan'aka ahiso Mwenye Mercier kiireke Mwenye Goad, wira awo anookawa ittikitti sa mavekelo. Mukhale vakhukuluni vanyu paahi. Naanaanoru numala muteko, mukhale vakhukuluni vanyu paahi wira amiravo evire muliinyani ni ekawe ittikitti sa mavekelo voowaakuveya sinweryaney'aya. Enrowa okhala mpithela wala vathi, nipuro pi nipuro, antaari a vathi wala nipuro pi nipuro muri-anyu, mukhale vakhukuluni vanyu paahi nto amiravo anoosuwela wira muri vaava mwaha wa ettikitti ya mavekelo. Nto vo ohiy'ula hiyo ninrowa okhala naavekelelaka aretta. Nto Apwiya yaahirukunxe muupuwelo aka, kintthuna kilaleerye ohiy'ula mwaha wa, *Mwanooniharu Atithi, Eyo Enooniphiyerya*.

<sup>21</sup> Vano kintthuna kisome yoosoma oxekuw'ola, wira kimpacerye *Wahala a Makhalelo*, eniphwanyaneya muLiivuruni mwa aHeperi, kapitulu 13, nto nrowe nipacerye va . . . Kaatthuna wira versikulu 12.

*Tivo Yesu tho, vakhwiyaawe ota wa mukhora, wira aareerihe athu n'iphome awe.*

*Nrowe . . . nto nakumane ni yoowo ota wa muttette, nivilelaka othanyiwa wawe.*

*Veekchai mu hiyo khanrina muttette w'okhala mahiku othene, masi nimphavela ole onrwa.*

<sup>22</sup> Vano ela enamuna ya yoosoma. Maana, nyuwo moone, akhala wahala a makhalelo, wala etthu p'itthu eri ya mutthu, hiyo khaninvuwiha eyo, ni vanci-enexa e—ekhalayi ya mutthu, yakhalaru yooriipelexa ntoko ekhanly'aya yawaka. Masi miyo kaahuupuwela wira, nasomaru Yoolempwa, Muluku aamureeriha Yoolempwa. Nto muupuwelo aka t'ula:

*Wira mu hiyo khanrina muttette w'okhala mahiku othene, masi nimphavela ole onrwa.*

<sup>23</sup> Vano, miyo koosuwela wira nyuwo woosivelani Los Angels vanci-ene. Nyuwo mookhalana ehakhi yo woosivelani. Owo muttette muulupale, wooreera. Ni mahittette aya ni itthu sikina, nlelo muttette wooreera, mukhalelo w'elapo wooreera. Masi muttette ola khunwerya okhala mahiku othene, ohaana okhalana emalelo.

<sup>24</sup> Miyo kootoko okhala oRoma (weiwo mamwene aalupale) ni mittette awo yuupuwel'aya wira yaamuteka soohikhwa, ni sinthimpw'aya inawo miloko miili [6 m] wira siphwanyawe milepe saya.

25 Miyo kootoko okhala vatthu maFarawo yaarin'aya omwene aya muulupale, ni mwaamuthipa etthaya wira mphwanye vatthu maFarawo aalupale yaalamul'aya.

26 Othene ahu onisivela wuupuwela muttethe ahu ni opuro ahu. Masi, muupuwele, khonwerya okhala mahiku othene.

27 Okathi waari-aka mwammiravo kaanirowaka vamwirini aseri muulupale. Elapo aka hiyo nihaana matoro manci-ene oolipa. Vano nto naahikhalana miri iya sa aseri, aseri a esukhari, ni ole oniihan'ahu "aseri oolipa" ni "aseri ootteela." Mwiri ula muulupale ni woorekama, waari mwiri woomalela oreera. Nto okathi waarwaaka kikhumaka omatta, kivaraka muteko mminyepuni ni—ni wohephani, miyo waanikisivela orowa vamwirini yoola muulupale n'u—n'ukilaathi vathi vaya n'u—n'uweha osulu. Nto kaaniwerya woona iriitta saya, suulupale ni soolipa sittikinyeyaka n'ipheyo, erikittili yuulupale. Nto kiiraka, "Moosuwela, kookupali wira mwiri ula onookhala va miyakha imiya imiya sene." Voohilekela kaahiweha mwiri ene yoowo wa khalayi, eyo exa paahi.

28 "Maana mu hiyo khanrina muttethe w'okhala mahiku othene." Nnari, khiyaavo hat'etthu mu elapo ya vathi enwery'anyu oweha enrowa okhala mahiku othene. Ehaana okhalana emalelo. Itthu sothene sinookhwa sihaana wiivahererya wa yoohikhwa. Vano hata wira oreera xeni nintek'ahu irampha sahu, oreera xeni onipak'ahu itekelo sahu, sothene sihaana omala, maana mu khiyaavo enwerya okhala mahiku othene. Ole Oohooneya paahi t'onikhala mahiku othene.

29 Miyo kinnuupuwela empa naakhal'ahu-mo, yaari empa ya khalayi ya matoro yoomariwa n'ottophe. Miyo . . . Khino alakela anci-ene khanatoko woona empa yoomariwa n'ottophe. Masi eyo yaari yoomariwa yothene n'ottophe, nto matoro maalupale yaari vampani ya khalayi iyo, miyo koonaka wira emp'ele yaamukhala miyakha imiya sene. Masi, moosuwela, olelo vatthu vaari emp'ele eri-vo etthokiheryo y'otekiwa ipa. Ti yoovirikana sana. Itthu sothene sinoorukunuwa. Masi . . .

30 Nto miyo kaaniwoonaka atithi aka, awo yaari mutthu ookhweya sana, oowithivala, a ikuru sana, ni awo yaari mmosa a atthu ookhweya ni ikuru sana kaasuwel'aka. Miyo kaahimusuwela Mwenye Coots, mutthu mmosa awo yaavaranak'aya muteko mmattoroni, owo aari namattoro, nto voophiyaka mwakha ntero ovinre, ni Mwenye Coots mpatthani aka ooreera murima sana, ni tiyakono a ekereja Patista Yoopacerya, nto owo iirale, "Billy, nyuwo muhaana okhala mutthu a ikuru sana."

Nto miyo khwira, "Nnari, nkihiyo, Mwenye Coots."

31 Owo khwira, "Nyuwo mwaalantte-ru atith'inyu, mwaamukhala." Khwira, "Miyo koomoona mulopwan'ole, arulelaka ilivura emiya ni miloko mixexe [64 Kg], ahelaka

nttoro nimosa mukaaroni meekh'awe, naalemela ilivura imiya thanu na xexe [408 Kg]." Owo aanisuwela moota wo wira. Owo aari a ikuru. Miyo kaanimoona ovolowa mpaani wira arape ni wiilikanyiha wira alye, okathi Ame aka yaamwiihan'aya.

<sup>32</sup> Ni hiyo naahikhalana mwiri mmosa wa masa mukhwipi wiitho, ni nto saahikhala miraru wala mixexe sikhaani wiithela. Nto mwiri w'eriyari yaahikhala eloola, ya khalayi, yoopweeya, yuulupale. Ni yaakhomeliwe vamwirini ni ipereku kamosa kamosa sookhutupuwasa. Sookhalaka ntoko ele amosa amosa a nyuwo makalapinteero muniwiriya mwaarow'anyu wiihana "ekapitu voothomeya-vo ekhasako." Yaarookhurupuliwa wira evareleke eloola vooपुरoni vaya. Ni yaahikhala epenti yaamukhaani ya exipwitta. Akavi atonko woona epenti ya khalayi. . . epenti ya khalayi y'exipwitta? Miyo kinniwerya hata woona.

<sup>33</sup> Ni nto yaahikhala ethaapwa yaamukhaani wookhattha-vo ikuwo, ethaapwa yaamukhaani ni mwetto woothetemana vathi vaya, yaakhomeliwe vamwirini vaavo. Mpompe mwaamukhaani, wa khalayi, wapakiwe ni nuusu na nikukulu vaavo hiyo naaxokolak'ahu maasi, ni naarapaka vamwirini vaava. Nto Amaama yaakuxaka mirupa sa otthu n'upaka ituwaya. Ookhala otonko orumeela etuwaya ya murupa wa otthu? Ahe, kookupali wira kiniisoona okhala owaani vano. Nto ituwaya iye suulupale, sa khalayi soowoma! Nto awo yanirapiha vale hiyo axinamwane, awo yaani. . . yaakhala wira yaakumiha esapala khula okathi awo yaattikitth'aya. Ni kinnuupuwela murup'ole wa khalayi wa otthu. Ni awo yaanitholola mikhoyi, n'upaka mayaya makhaani, wira ereerihe vakhani.

<sup>34</sup> Akavi atonko orupa voolilini va malaxi? Ahe, miyo ki—kinoohimya! Akavi atonko osuwela ele waari musawu wa malaxi? Ahe, Munna Glover, kiri owaani vano, vekeekhai! Olili wa malaxi, ahe, khovinre okathi munci-ene ohin'ye aka orumeela mmosa, ni owo waari. . . Oh, ti—ti wooreera orupela, wooriirya. Nto okathi wa eyiita waakuxiwa olili wa mapururu ni wummathela, nyuwo moosuwela, nto vo naahaana oheleliwa ekapatti y'elooona vasulu vahu okhala wira etthapwe yaaninseelela i—i—iphaka s'empa, nyuwo moosuwela, vaavo iphalapasi saakhurupuwel'aya osulu, nyuwo moosuwela, nto etthapwe yaavolowa memmo. Ni, oh, miyo kinniwerya wuupuwela eyo sana.

<sup>35</sup> Nto vo Atithi aka yaahikhalana nvelo wa ireru. Miyo. . . Vano ela enimootutuxani. Owo waapakiwe ni makarasa a nakhuwo, nvelo wa ireru waarina makarasa a nakhuwo. Awo yaanikuxa esapawu yoopakiwa ni ettuurwa ya maama awo yaapak'aya, n'ulikanyiha ni ohela owiitho waya ni nvelo yoola wa makarasa, ni omettha ireru nnimettho nuulupale, na khalayi. Nto Ttiminku awo yaakuxa ipa-ipantte sa epaphelo, n'uhela vamukalani vaya, awo yaawaraka mikala sa seluloite n'uhela vamukalani siisa sa

wira ehimorozele ma—ma—mapheru vamukalani v'ekamisa aya. Nyuwo mootoko woona eyo yiiriwaka? Vano, wulu, wulu!

<sup>36</sup> Miyo kinnuupuwela muro mwaamukhaani ohitto iwe, weiwo naarowak'ahu owurya maasi, ni okuxa maasi ahu mukahini ya khalayi ya nsuku. Akavi atonko woona ekahi ya nsuku? Ahe, akavi a nyuwo akhanle a oKentucky, khula enamuna? Ayo, ahe, nkawehani va paahi, aKentucky. Ahe, wulu, miyo ki—miyo kiri o... Miyo koono wira othene yaari atthu a Oklahoma ni Arkansas va, masi enikhala ntoko Kentucky onithaamela weno. Ahe, ohooneliwa pataroya oKentucky miyeeri vakhani sivinre, nyuwo moosuwela, vano khino awo t'amosa amosa anoorwa nno.

<sup>37</sup> Nto vo miyo kinnuupuwela okathi Atithi aka yaakel'aya mpaani ni wiirapiha wira elye, awo yaanikhuna miyoono sa ekamisa aya, ni moyoono iye sikhaani soowithivala. Nto okathi yaavenx'aya miyoono saya wira yiirapihe, yaanihela maasi owiitho waya, mitika iye saakumiha mathekeneke mmiyoononi mwaya sikhaani. Nto miyo khwira, "Moosuwela, atithi aka anookhala mpakha ophiya miyakha emiya ni miloko mithanu." Awo khayaareere ikuru! Masi akhwiyeye arinane miyakha miloko mithanu ni miili. Munnona? "Mu hiyo kharina muttethe w'okhala mahiku othene." Eyo ekeekhahi. Khaninwerya okhala mahiku othene.

<sup>38</sup> Vano nrowe neette mukwaha mwaamukhaani, othene ahu. Khula mmosa a nyuwo va ookhalana wahala a makhalelo awe, ntoko siiso miyo kirin'aka, ni ti yooreera weetta ephiro ya muupuxero imara kamosa kamosa. Khamunuupuwela siiso? Mutthike paahi, ni nrowe othene nitthike vakhani, nitthikele misuwelelo soolikana ntoko anamwane.

<sup>39</sup> Nto vano mpantta woopacerya a wahala a makhalelo aka. Miyo kinrowa ohimya vakhani paahi, 'okhala wira eri muliivuruni ni anci-ene a nyuwo mookhalana eliivuru ene.

<sup>40</sup> Miyo kiyariwe mmuxaaxani mwaamukhaani mmwaakoni, osulu iwe miyaako sa oKentucky. Awo jaarina ekatthi emosa memmo waakhal'ahu-mo, yoohikhalana ekhukwa vathi, nnakhala ithaapwa vathi, waari vathi woohikhuneeliwa paahi. Ni exa, vasulu va exa yoothikiliwa jaarina metto miraru, awo yaari meesa ahu. Nto aBranham othene ale axikhaani yaathukumana vaavale erukurenrye-ene, nto ohoolo wa muxaaxa owo mwaamukhaani wa khalayi, ni yaaniwolowasa, vaakhala ntoko nikoto na akamba yaarooowolowasa vate vale vantthupini, nyuwo moosuwela, axihim'aka othene axikhaani. Naari athanu n'axexe, ni mwanamwane mwaamuthiyana mmosa, ni owo aaphwanyaneya ookattyamiheya eriyari ya nikhuru nle n'aximiravo. Hiyo nihaana omuttittimiha owo hata olelo wa itthu siirak'ahu mahiku ale. Owo khaawerya orowa ni hiyo hata nipuro, hiyo naanimuttikiha, owo aari mwamuthiyana.



Tivo owo khaawerya ni hiyo, nyuwo moosuwela. Vano hiyo naahikhalana. . . Nto othene. . .

<sup>41</sup> Kinnuupuwela wira ottuli wa meesa naarina ikhukulu piili paahi, ni saapakiwe ni mapapatthu a irintta sikhaani. Ikopo sikhaani paahi sa nokeera piili saaheliwa vamosa, nto erikittili aya yoothaveliwa ni nipapatthu na nokeera. Ookhala otonko wona ekhukulu ya nipapatthu na nokeera? Ayo. Nto miyo nlelo kinniwerya owiwa Amaama. Oh, ohoolo waya okathi othamenly'ahu nipuro nikina awo yaawery'aya okhalana vathi vooheliwa ithaapwa, n'anamwane ale yaayanre ene ottuli waya sa, ni yiinihaka ekhukulu ile ya khalayi pam, pam, pam vathi. Ni miyo kinnuupuwela kaakhoottihaka anamwane okhumela vate, okathi awo yaakhatth'aya ikuwo wala etthu siiso, awo yaanaatalela ekhukulu n'urukunxela epantte emosa ya mukhora, wira yaakhottihe anamwane ale okhumela ota okathi awo yaarow'aya omuro orika maasi, ni siiso.

<sup>42</sup> Nto Amaama yaarina miyakha muloko ni mithanu okathi oyariw'aka, Atithi aka yaarina muloko ni mithanu na miraru. Nto miyo kaari oopacerya a anamwane athanu n'axexe. Nto khukileela wira voosiisu kiyariw'aka. . .

<sup>43</sup> Vano, hiyo khinaareere ohaawa, ootepaxa ohaawa a anamuhaawi. Ni hiyo khinaarina hata ecanela vamuxaaxani vaava. Owo waarina etthu ntoko mukhora wa nttoro munihul'anyu. Miyo nkinkupali sinto nyuwo mootoko wona etthu siiso. Mukhora mwaamukhaani wa nttoro mwaahul'anyu ohiya ecanela, munihiy'anyu woohuliwa othana wothene ni mwaawal'anyu ohiyu. Hiyo khanaapattiha aluuxu wala hata omupattiha patarootya mahiku ale, hiyo naarina ele eniihan'anyu "ekhanttiyero ya makhura." Vano, miyo nkisuwenle sinto nyuwo mootoko osuwela ekhanttiyero ya makhura yaari exeni. Ahe, exeni nyuwo. . . Ni nyuwo mootoko othuma. . . opattiha niphitto na pinyeero? Vano mukuxe niphitto na pinyeero nto mpattihe mpwehe veekhuneeloni, eyo enoopatta. Ni eyo. . . yaanikhuma mwiixi vakhani, masi khayaarina ikaruma sa vatthokoni, khula enamuna, wira saamusareya mwiixi. Tivo paahi. . . muxaaxa waanisareya mwiixi. Yaaniviriha sana mwiixi 'okhala wira yaahikhala epatho yoophiyerya wira ovireke-vo. Vano eyo. . .

<sup>44</sup> Nto miyo kiyariwe Abril ni—nihiku na 6, 1909. Vekeekhai, nyuwo moosuwela, eyo enihimya wira koovikana vakhani miyakha miloko miili ni mithanu vano. Nto siiso, voosiisu oyariw'aka, Amaama ahimmye wira awo yaahihula ecanela. Vano, hiyo khinaarina hata matothoro, aahikhala mulipa-ooyariha mmosa. Paahi. . . Nto mulipa-ooyarih'owo yaari apiipi aka. Nto vano okathi kiyariw'aka nto wunla waka woopacerya, ni—ni Amaama yaatthuna omoona mwan'aya. Vano—vano yaawo ene khayaari hat'etthu woohikhala mwaana mmansaya. Nto okathi ehuliw'aya ecanela yaamukhaani, omalakaruru oxa, voophiyaka ewoora ya neethanu. Nto e. . . Aahikhala miryapwe

mutokweene aakilanthi vamwirini mwaamukhaani. Ntoko nyuwo othene munoonak'anyu elatarato aya mu—muliivuruni mwa wahala a makhalelo aka. Miryapwe mutokweene aakilanthi vale iipaka ni sothene saari mwa yoowo.

<sup>45</sup> Miyo kweekwe t'okisivela amiryapwe. Vano, nyuwo aximiravo muninwiryana raatiyu, muhiwoopele axipalame aka. Nyuwo moone, awo—awo—awo...Awo axipalame aka. Nyuwo mootoko wiiwa ehantisi ya miryapwe, moota orin'awe etthirima awe yooxeerya? Kinoomalela vaava okathi vakhani. Moota okhalanne awe etthirima awe yooxeerya...Aahikhala Mwene a mamwene aakhwa nihiku nlo Vamwiikimanyo, nto Owo aamuhaawa ni khaavo aarwa wa Yoowo. Owo khaarina hata mutthu wira amukhaliherye. Nto aahikhala mwaapalame mmosa ookhwila aatthuna okumiha ipereku iye Vamwiikimanyo, nto owo aanitthikela avelaka Vamwiikimanyo apurulaka ipereku iye. Owo aari ooyevaxa wira apurule, vano owo khukhalana etthirima awe yothene yooxeerya ni ephome. Nto okhuma vaavo etthirima awe enikhala yooxeerya. Muhimoopele, aximiravo. Mmuhiye mmansawe.

<sup>46</sup> Owo aakilanthi waattamela vacanelani, iipaka ntoko amiryapwe aniip'aya. Nto—nto Atithi aka khukakhela ecanela ottuli. Nto vakakhenly'aya mukhora w'ecanela mwaamukhaani ottuli, Warya iwe munoon'anyu valataratoni khurwa orukureryaka vacanelani, anihimya t'amey'aka, nto khukhala vasulu v'olili. Apiipi khayaasuwela etthu y'ohimya.

<sup>47</sup> Vano, hiyo na...khanaari etthoko y'anatiini. Atthu aka aKatolikaa. Miyo ka mw'Irlanda mwa ipantte soopiili. Atithi aka yaari amw'Irlanda oomalela, Branham. Ame aka a Harvey; atithi aya paahi, ti yaamuthenle Muhinti Cherokee, vano eyo khuhonona nihimo na ephome ya maIrlanda. Nto Atithi n'Amaama khayaarowaka okereja, awo athelanne ota wa ekereja ni khayaarina hata etiini. Nto mmwaakoni mme khayaakhanle hata ekereja Katolika. Vano awo jaarwiiye mwa makolono oopacerya, aBranham anli ti jaarwiiye, okhuma yaawo khikhuma nloko nothene na aBranham; ti nihimo n'amusi.

<sup>48</sup> Nto vo awo khihula...Okathi awo ahunly'aya ecanela ela ni Warya nno khweemela mpaani mme, awo khayaasuwela etthu yo wira. Atithi aka khimuthuma (Amaama t'ahimmye) makakawu musya mwaha wa yookhumelela ela. Awo yeemenle ni... miyoono saya vatthirima va makakawu uwo, ntoko anaikhuni ni matoro saawarak'aya mahiku ale. Nto owo khwaatutuxa.

<sup>49</sup> Ahe, vamanly'aka okhalana mahiku muloko khino, wala etthu siiso, awo khukiroiha ekereja emosa yaamukhaani Patista eniihaniwa "Omwene wa Kamba," Ekereja Patista Omwene wa Kamba. Nlo nsina ni siiso. Aahikhala mulaleyi mmosa mutokweene a khula nihiku, mulaleyi uwo a enamuna ya

khalayi muPatista aaviraka vale emara emosa muhina wa miyeeri miili. Va . . . Atthu yaanikhalana muteko w'okokhorela mwaamukhaani vamosa, awo yaanirowa wiipa isipo kamosa kamosa, masi awo yaakhalana olaleiwa wa masu imara kamosa kamosa ni mulaleyi mmosa eettaka. Awo yaanimuliva khula mwakha ni murupa mmosa wa amarapo ni itthu vakhaani siiso, nyuwo moosuwela, atthu yaalim'aya wira emuvaheke. Nto mulaleyi mutokweene khurwa vale, khuvahererya nivekelo mwaha wa miyo ntoko mwammiravo. Owo waari mukwaha aka woopacerya orowa okereja.

<sup>50</sup> Mwa miyakha soophiyaka . . . voophiyaka miyakha miili wunnuwa, yoowoona woopacerya khwiiraneya.

<sup>51</sup> Ahe, awo yaahihimya omwaakoni iwe wira Warya nno waahirwa. Vano awo khuphavela osuwela. Akina yaahimya wira khino waari warya wa nsuwa naamwaleya muloolani mpaani. Masi khayaakhanle hata eloola mpaani mme. Ni nsuwa khanaakhumme, waari oxaka-ene, ewoora ya neethanu. Nto vo, oh, awo khiyaacanli Nlo. Nto okathi waari-aka oophiyaka . . . kinooona wira khino miyakha miraru . . .

<sup>52</sup> Vano, kihaana okhala naxariya. Sookhala itthu va sihinikisivela ohimya, nto miyo kaatthuna kihiyee ni kihikhale oohimya. Masi nlelo, wira kihimye ekeekhai, nyuwo muhaana ohimya ekeekhai mwaahimiyaka sa mmansinyu wala atthu anyu. Mukhale naxariya wa yeeyo, nto vo etthu emosaru khula okathi.

<sup>53</sup> Atithi aka yaahirakamela okhala mutthu natiini. Awo yaari mmiravo a mmwaako vekeekhai aawuryaka voohihyererya, okathi wothene. Ni awo yaahiphwanya mulattu ewanaka ekhotto, nto yaarookhala axilopwana anli wala araru yaahalela ekhwa okathi yaawan'aya, yoopelanaka, ni ethikilanaka mmosa ni mukhw'awe ni miyaalo, mwa enamuna emosa ya niira mmwaakoni. Nto Atithi aka yaari mmosa w'alipa ooholela ekhotto ela, okhala wira aahikhala mpatthani aya aavulanle, ni aammaanne mutthu ni ekhatera. Ni aahikhalana . . . Mulopwan'owo aarina mwaalo ni aarowa omuthikila mpatthani aya Atithi aka vathi ni mwaalo ola, vamurima wawe, nto Atithi aka khumwaakiherya. Nto vekeekhai khino yaahaana okhala ekhotto yoowoopiha, okhala wira awo, okhuma oBurkesville, imilya sinci-ene soorakamela, awo khimuruma mupilisa wira aarowele Atithi aka, ni ekhavallo.

<sup>54</sup> Tivo mulopwan'owo aahalela ekhwa. Khino aakhala atthu a m'wemusini mwawe aniiwa mu. Miyo kinooromola nsina nawe, Will Yarbrough naari nsina nawe. Awo khino . . . Miyo kinooona wira akina wa awo ari oCalifornia, w'ana awe. Masi owo aari mutthu-mutthu, mutthu a ikuru sana, aamwiivale mwan'awe ni araame a kintaali. Vano owo—owo aari mutthu a ikuru sana ni ootakhala. Nto vano yaahikhala ekhotto yuulupale ya miyaalo owo ni Atithi aka. Nto atithi aka yaahala vakhani

omwiiva mulopwan'owo, vano awo yaahaana otthyawa okhuma oKentucky olapuwa muro mpakha oIndiana.

<sup>55</sup> Ni yaahikhalana munn'aya, okathi uwo aakhala, oLouisville, Kentucky, mukhulupale a nenli a Maxapo a Mosaiku sa Miri oKentucky, oLouisville. Nto vano Atithi aka khurwa okumana n'amulupale aya. Atithi aka yaari oomalela oyeva mw'aximiravo, w'ana muloko n'athanu nanli. Nto vano awo khurwa okumana n'amulupale aya, nto okathi yaari-aya weiwo voophiyaka mwakha ntero. Awo khiyaawerya otthika, okhala wira nlamulo naanaaphavela. Nto vo okathi naakhenly'ahu ihapari saya mwa epaphelo, yoolepiwa nsina nikina, masi awo yaahaalela Amaama moota yaarow'aya okhala voowi awo yiiwe ihapari saya.

<sup>56</sup> Nto vo kinnuupuwela nihiku nimosa muro ola (muxaax'ola mukhaani) waari wiithela w'empa. Nto—nto okathi ene yoole numala...Sookhala mithanu na xexe...miyeeri muloko ni mmosa sivirikanne ahu miyo ni muhim'aka onikitthara, nto owo iira nlelo aapasaka. Nto kaahikhalana nluku nuulupale mmatatani mwaka, ni keererya omoonihha moota kaawery'aka vaalupale orihela nluku nla voottopheni, vaavo muro waavinry'aya khukhalaha nipuro nla na mattope. Nto kaahimwiiwa mwaapalame, vano owo iipa musulu mmwirini. Nto kiweha musulu mmwirini memme vano mwaapalame khuvava, nto, okathi ovanve awe, Nsu nimosa khulavula ni miyo.

<sup>57</sup> Vano, miyo koosuwela wira nyuwo munuupuwela wira miyo nkaawerya otthokelela ni wuupuwela eyo. Masi Apwiya Muluku Yaawo akhanle Mphuki, elapo ya vathi ni wirimu ni sothene sikhanelle, annisuwela wira kinihimya ekeekhaii.

<sup>58</sup> Mwaapalame ole, okathi ovanve awe, Nsu nimosa naahikhuma vaavo mwaapalame waary'awe-vo mmwirini, ntoko etheku enaapheelela etakwarikhwa, nto Nlo khwira, "Munoorowa okhala waattamela epooma emosa eniihaniwa New Albany." Nto kinnikhala, okhuma okathi kaarin'aka miyakha miraru mpakha okathi ula, muhina mwa imilya tthaaru [5 Km] sa New Albany, Indiana.

<sup>59</sup> Miyo kaahivolowa khwaaleela amaama yeeyo. Ahe, awo yoona wira miyo kaamuloha paahi wala etthu siiso.

<sup>60</sup> Ohoolo hiyo khuthaamela oIndiana nto Atithi aka yaaronwe omuvarela muteko mulopwana mmosa, Mwenye Wathen, mulopwana mmosa thaaciri. Owo ti mwaneene Miyeekeo Wathen. Ni owo aahikhalana mihakhu sulupale; owo mutthu orina imilyawu sinci-ene, ni Makoroneli a oLouisville, ni—ni basebol, ni sikina. Nto vo hiyo naakhala waatamela weiwo. Nto Atithi aka ari-ene mutthu masikhini, nnya khayaawerya okhala ehivunrye, tivo awo—awo khupacerya opaka wiskhi mu—munlithini.

<sup>61</sup> Nto eyo yaari ekoyi wa miyo okhala wira kaari muulupale a anamwane othene. Kaahaana orwa n'uteexa maasi a mulithi yoola, wira eririheke miphili iye sooripithuwa okathi awo yaamupak'aya wiskhi. Nto awo khupacerya omutumiha, nto vo awo khukhalana milithi miili wala miraru. Vano, vo ti vatthu vahinikisivela ohimya, masi eyo ekeekhaii.

<sup>62</sup> Ni kinnuupuwela nihiku nimosa, munikhomani, kaarwa owaani, kinlaka. Okhala wira wiithela wa nipuro nlo naahikhala ntthiya, nlo . . . vaavo yaathikiliwaka exeelo. Anciene a nyuwo munnuupuwela okathi yaathikiliw'aya exeelo n'uheliwa vatthuparini. Ahe, Eyo p'inamuna Mwenye Wathen aapwehaawe exeelo omatta. Nto Atithi aka yaari xo—xoofero a yoowo, xoofero a meekh'awe. Nto okathi n . . . ntthiya nla naasareye aya ihopa ni okathi awo yaarow'aya othikila exeelo n'uruuha mpaani n'uhela vatthuparini, nto okathi exeelo yaathuluw'aya elimwe okathi yaakhuruw'aya, yaakhala yoowooneela vakhani kookupali, yoolikanexa ntoko exeelo ya vantthiyani, nto awo yaaniwerya orumeela, kahi owurya, masi oriiraha maasi, yaanihelela micoma saya ni eleethi aya, ni sikina.

<sup>63</sup> Nto nihiku nimosa kiteexaka maasi okhuma vampompeni va, yoowo waari sintoko ekwarterawu emosa. Miyo kaamukhupanya mpakha ohiwerya-tho, okhala wira miyo kaamutthikaru oxikola nto aximiravo othene yaaronwe ontthiyani, omiserya. Miyo waanikisivela omiserya pahi. Nto vano othene aya khurwasa omiserya kuhala miyo, ni kaahaana oteexa maasi a mulithi ula. Vekeekhai, wulu, yaahaana okhala voomaaleleya, yaanikhootthiwa. Nto miyo . . . Yaari ekoyi sana. Ni kinnuupuwela kirw'aka kikwattunle-ene ekatha, ni kaahikhhalana mukopootthi wa nakuwo kitthunke-ene ekatha aka ya munawoni wira ehikele ntthupi. Mootoko wira yeeyo? Muhele mukopootthi wa nakuwo paahi vathi v'ekatha anyu ya munawoni *sa* mwaaphelelihe mukhoyi. Owo onoovarela ekatha anyu sana oroihaka osulu ntoko muru wa khapa, nyuwo moosuwela, okokhelaka osulu. Mwaamuwerya otthara mphito aka khula nipuro kaarow'aka, ni mukopootthi yoola wa nakuwo vathi v'ekatha aka; vaavo kaakwattunle aka, nyuwo moosuwela. Nkaarina hata ixapattho wira kiware. Vano hiyo khinnawareke ixapattho, imara sikina mpakha nusu w'okathi w'eyiita. Vakhala wi nootoko owara, hiyo . . . saari iye naattott'ahu, mutthu aanivah'awe. Ni ikuwo mutthu, alipoomoriwa ikharari yaanivah'aya.

<sup>64</sup> Nto kaaheemela vathi va mwiri yoola, ni kaakilanthe vaavo kikhupanyaka (waari Setembro) okhala wira kaatthuna orowa omiserya, kaahaana oteexa ipariri sinciene sa maasi ni micoma sikhaani s'oravo, soorekama ntoko *siisaale*, nuusu na ekalawu [yoophiyaka 2 l], 'okhala wira kaari mwanamwane mwaamukhaani oophiyaka miyakha mithanu na miili. Nto kaanihela mparirini yuulupale n'utthikela-tho orika micoma

miili sikina n'utthika, kixekulaka mpompe. Awo ti maasi naarin'ahu. Nto awo yaarowa omupaka whiskhi vakhani a nakhuwo ohiy'ule, axilopwana ala n'Atithi aka, osulu iwe waattamela owaani.

<sup>65</sup> Vano miyo kaamunla, nto naanaanoru kaahiiwa etthu onyakula ntoko eyuupuru, etthu emosa ntoko ela (vano, kinroromela wira khennyakulaxa), erowaka "Vuum, vuum," onyakula paahi siiso. Ahe, waari voomaaleleya sana, nto miyo kiwehaweha. Nto nyuwo moosuwela, eyuupuru yaamukhaani, miyo kookupali wira muniihanaka itarupa sikhaani? Okathi w'ephovo iyo sinoovenya mmatta mwa nakhuwo, nyuwo moosuwela, makukhu ni sikina, okathi w'ephovo iwe, makukhu yaahipacerya othatuwa. Nto kaari vathi va mwiri aalamo muulupale wootteela, waari ntoko eriyari ya nikhoma ni e—empa. Nto kaahiiwa onyakula iwe. Nto kiwehaweha, sothene saari soomaaleleya ntoko siri-aya musaala mu. Hata nikukhu nihiveveleyaka hata nipuro, wala hat'etthu. Nto miyo kuupuwela, "Onyakula iwo onikhuma woowi?" Ahe, miyo kuupuwela, "Siiso okhanle-ene ottai ni va." Mwammiravo paahi. Nto khukhala enyakulaka enyakulaka.

<sup>66</sup> Miyo kikuxa micoma saka sikhaani kikhupanya-tho imara piili kipacerya otthara mphito, kaammumula. Nto kiphiya inawo vakhani okhuma vaavale, kikhuma vathi va irintta sa mwiri ula muulupale, nto, oh, wulu, owo khuruma ntoko eyuupuru. Vano kirukunuwa wira kiwehe, nto sintoko eriyari ya mwiri ule yaahikhala eyuupuru ekina, yaapheelenle-ene mwiri ule erukureryaka erukureryaka paahi, ettikinyaka makukhu ale. Ahe, miyo kuupuwela wira khiyaari hat'etthu yootikiniha wa yeeyo okhala wira waari okathi ule wa mwaakha paahi, ni ephovo, vano, iyuupuru iye sinimoorwa. Yaamukhaani. . . Hiyo nnihana "iyuupuru." Nto iyo—sintannya ntthupii. Nyuwo mootoko wona mothakoni siiso. Etthu yeeyo. Vano miyo kiweha, masi eyo khiyaaronwe. Imara sinci-ene mwinseelelo w'okathi vakhani paahi, nto enoorowa, masi eyo yaahikhala vale minutu miili wala soovikana.

<sup>67</sup> Ahe, miyo kipacerya otthara-tho mphito. Vano kirukunuwa wira kiwehe yeela tho. Nto Eyo vairaly'aya siiso, Nsu na mutthu noowiiweya sana ntoko niri-aya nawaka, khwira, "Muhikhalakhale nwuryaka, omulya sona, wala ohonona erutthu anyu mwa khula enamuna. Wookhala muteko onrow'anyu ovara mwannuwa vale." Vano, eyo yaahalela okiiva mwaha wo okitutuxa! Nyuwo mwaamuwerya otthokelela moota mwammiravo mwaamukhaani oon'awe. Miyo khuhiya micoma iye, kirowa owaani voowaakuvaxa ntoko saawery'aka, kinyakula woviiutuperya.

<sup>68</sup> Nto saahikhala icopperhead nipuro nle, inowa, nto iyo ti soowiiva sana. Amaama yuupuwela wira, kikhumaka owortha khino kaaroonyakela copperhead vano awo khurwa

ekithipeeryaka. Vano miyo kituphela mmoononi mwaya, kinlaka, kaapatikhaka ni kaapecariki. Vano awo khwira, “Exeni ekhumelenle, muroolummwa enowa?” Khukiwehaweha miyo othene.

Miyo khwira, “Nnari, Maama! Ookhala mulopwana mmwirini mme iwe.”

<sup>69</sup> Vano awo khwira, “Oh, Billy, Billy! Exeni iyo?” Vano awo khwira, “Mwaarimweemela khurupa?”

<sup>70</sup> Miyo khwira, “Nnari, muthiyana! Ookhala mulopwana mmosa mmwirini mme, nto Owo okileenle wira kihiwurye ni kihimulye sona.”

<sup>71</sup> “Waawurya awiskhi ni—ni itthu siiso.” Nto miyo kaakunxe maasi a mulithi wa wiiphiini, okathi ene yoowo. Nto Owo khwira, “Muhikhalakhale nwuryaka wala ohonona erutthu anyu mwa khula enamuna.” Eyo ti yoonanara, nyuwo moosuwela, ni mwan’aka. . . aximiravo n’athiyana. Nto vansuwel’aka, miyo nkinatoko hata emara emosa ottheke wa yeeyo. Apwiya aakikhaliherya wa itthu iyo, nto okathi onrow’aka ohoolo nyuwo munoosuwela. Vano nto, “Muhiwurye wala muhimulye sona, wala muhohonone erutthu anyu, maana onookhala muteko onrow’anyu ovara mwannuwa vale.”

<sup>72</sup> Ahe, miyo khwaaleela eyo Amaama, nto—nto awo khukitheya paahi. Ni miyo kaari oovariwa murima paahi. Awo khumwiihana tothoro, nto tothoro khwira, “Ahe, owo oookwanyuwa paahi, ti yeeyo tu.” Vano awo khukaatalela voolilini. Nto miyo nkinatoko, okhuma nihiku nenlo mpakha nla, nkinavireke vamwirini vale tho. Kaanoova. Kaakhuruwelaka epante ekina ya ewortha, okhala wira kuupuwela wira aahikhala mutthu mmwirini mme ni wira Owo aalavula ni miyo, ni Nsu nuulupale naalavul’awe.

<sup>73</sup> Nto vo emara ekina voophiyaka mweeri nuvira yeeyo, kaattikha iperlintu n’axihim’aka, vate vapuwani owiitho w’empa. Nto naanaanoru kaahoona etthu yootikiniha okiira. Vano kaaheemela khukilaathi waattamela vamwirini. Nto hiyo naari osulu mukerekhere wa Muro Ohio. Nto miyo kiweha ohitto oJeffersonville, khoona eponti ovenya etuphaka yoole, muro ole, ovira vasulu va muro. Nto kaahiwoona axilopwana muloko n’athanu na mosa (Kaahiwaalaka) yaamonre vaavale khupweteya ekumi aya vaponti vaavale. Miyo kitthimaka vowaakuva khwaahimeerya ame aka, vano awo yuupuwela wira kaaroorupa. Masi atthu khayaaliyanle, nto sivinry’aya miyakha miloko miili ni miili okhuma okathi yoowo Eponti Munisipale vano (yeeyo anci-ene a nyuwo munilapuw’anyu mwaalapuwaka vale) yootupha muro nipuro nene nenlo, ni axilopwana muloko n’athanu na mosa ehaapweteya ekumi aya etekaka eponti ile entupha muro owo.

<sup>74</sup> Khenavonyeyeke okhala ekeekhai voomalela. Ntoko nyuwo sinoon'anyu Eyo mu mw'autitoriyu, enikhala siiso okathi wothene.

<sup>75</sup> Vano, awo yuupuwela wira miyo kaarookwanyuwa paahi. Yeeyo, miyo kikhanly'aka mutthu ookwanyuwa, eyo ekeekhaii. Nto, vakhala wira nyuwo mootoko oweha, atthu ootthunaka okhala a muroohoni t'okwanyuwa.

<sup>76</sup> Nkaaweheni alipa-oolepa ni maprofeta. Ni nkanweheni William Cowper olempe esipo ele yoosuweliwa, "Yookhala ephattuwelo yoosareya Ephome, enikumihwa mmutikani mwa Emanuweli." Nyuwo mootoko...Nyuwo munnisuwela esipo ene. Miyo kaahikhala vakhiviru vamahiye vawe kahi khalayi. Munna Julius, kookupali, nkisuwenle, nnari...ayo, ti yeeyo, aari ni hiyo weiwe vamahiye vawe. Nto—nto vale, vamanly'awe olepa esipo ele, muupuxeryo ene khimukhuma, khunatthuna ophwanya mu—muro wira iisiive. Moone, Eroho yaahimuhiya. Nto atthu ntoko alipa-oolepa ni anamapaka ni...ahiso nnari... kinaahimya maprofeta.

<sup>77</sup> Nkanweheni Eliya, okathi aari-awe vamwaako khwiihana mooro okhuma wirimu ni khwiihana epula okhuma wirimu. Nto okathi Eroho emuhin'ye awe, owo aarootthyawa mwaha wo woopopihiwa ni muthiyana. Nto Muluku khumphwanya iipinthe ene mmuttuphani, mahiku miloko mixexe ohoolo waya.

<sup>78</sup> Nkanweheni Yona, ni muupuxeryo woophiyerya okathi Apwiya yaamureerinhe aya wira alaleye iwe oNinive, mpakha mu—muttetthe woolikana ni St. Louis orukunxa murima ni owara esaakho. Nto vo okathi Eroho emuhin'ye aya, exeeni yaamukhumelenle? Hiyo nimmuphwanya vasulu vamwaako vaamanly'aya Eroho omuhiya, avekelaka wira Muluku akuxe ekumi awe. Nto, nyuwo moone, owo muupuxeryo. Ni okathi itthu iya sinikhumelel'aya, eyo—eyo enniwiirihani etthu.

<sup>79</sup> Vano kinnuupuwela wunnuwa. Kaahiphiererya okhala mmiravo. (Kinimwaakuva wira kimalihe naanaano.) Okathi ophiyenry'aka okhala mmiravo kaarina ankhili ntoko amiravo othene. Miyo...keettaka oxikola, kaanaaphwanya axiruusi ale. Nyuwo moosuwela, kaanoona ehaaya vanci-ene, moosuwela. Nto vooki—vookiserya miyo kaahikhalana mposi. Nto ntoko aximiravo othene, oophiyaka miyakha muloko ni mithanu, woona waka. Nto—nto vano, oh, owo aari ooreera. Wulu, aarina maitho ntoko epompa, ni aarina maino ntoko nluku noowaarya, ni exiko ntoko nrattha na mmuro, ni owo—owo vekeekhai aari ooreera.

<sup>80</sup> Nto mwammiravo mukina, owo...hiyo naari apatthani, vano owo khikuxa ekaaro y'atithi awe Ford muthinto-T, ni naahilaihana okumana n'aximwali ahu. Ni naarowa waakuxa, wira neettakase. Naarina woophiyerya omuthuma kasolina ikalawu piili [ophiyaka 8 l]. Naahaana ovenxa eroota y'ottuli



wira nitthukule ni maniveela. Nkisuwenle sinto munnuupuwela yeeyo wala nnari, nyuwo moosuwela, orumiha maniveela. Masi hiyo—hiyo naamurowa sana.

<sup>81</sup> Nto siiso kaahikhalana musurukhu vakhaani wa isentavo thanu mpeesani, vano hiyo khweemela nipuro naamukhaani khuthuma...vaaniweryaneya othuma ephawu erina enama y'evaro muhina ni isentavo thanu. Nto vano, oh, kaari thaacirii, kaaniwerya othuma xexe! Munnona? Nto vamanly'ahu okhuura iphawu sene ni omuwurya Kooka, kipacerya okuxa isuupha kittikihaka. Nto otuthuwa waka, okathi okhumenly'aka ota, (athiyana yaahipacerya ohiya mahala okathi ule, ahiso omuthiyana) epompa aka yaamukhaani yaamulya sikaro.

<sup>82</sup> Ahe, miyo okathi wothehe kookhalana muupuwelo aka mwaha wa muthiyana aarowa omulya sikaro, ni nkinarukunuwe hata vakhani okhuma okathi yoowo. Eyo ekeekhaii. Eyo etthu yoomalela ohifayi owo oniiraawe. Vano vekeekhai eyo ekhweelii. Nto miyo—miyo kuupuwela wira miyo...Vano, efaapirika ya sikaro yaamuwerya okithara mwaha wa yeela, masi, kinimooleelani, iwo otakhala wa xetwani. Owo ti mulipa-oowiwa muulupalexa ni oohonona elapo ela orin'aya. Miyo kaamwamputi mwan'aka mmiravo okhala namuhapaliwa ohikhanle nammulya sikaro. Eyo ekeekhaii. Kaamwamputi owoona amwaar'aka ammaathale ene vathi, oohapaliwa, ehikhanle owoona ni sikaro. Eyo ti moota...

<sup>83</sup> Vano, Eroho ela ya Muluku eri ni miyo, vakhala wira Eyo Eroho ya Muluku (ntoko saarow'anyu okoha), nyuwo omulya sikaro murina ereerelo vakhani mwaphiyaru iwe, 'okhala wira eyo paahi...khula okathi. Nyuwo mooweha eyo vaplataforma, moota Owo onimuulumel'awe. Etthu yoonanara. Mwiirakamelihe. Axithiyana, nyuwo mwaatthenke ene wa yeeyo, xontte, mwa Nsina na Kristu, mwiirakamelihe! Owo onimoothonani. Owo onoowiivani. Owo...Owo e—evakawu yoosareya kankuru.

<sup>84</sup> Matothoro aneererya woolopolani. Vano nto mwaha wa xeni awo anoothumihery'ayani nakoso owo! Vaakhanle wira mwaamurowa ofaramaasiya ni wira, "Othuma...kintthuna kithume isentavo miloko mithanu sa kankuru." Vano, awo yaamoowa owala mikhora sanyu. Masi nyuwo mwaathumaka isentavo miloko mithanu sa sikaro, nyuwo munthuma etthu emosaru yeeyo. Matothoro anihimya siiso. O, elapo ela yoosivela musurukhu. Ti yootakhala. Owo namwiiva. Ennooniheriwa.

<sup>85</sup> Ahe, okathi omoonaly'aka mwali ule ooreera iiraka soohiphwanela, sikaro ola mmatatani mwawe, yaakhala ntoko aarookiiva, 'okhala wira miyo koono wira vekeekhai kaanimphenta. Nto miyo kuupuwela wira, "Ahe..."

<sup>86</sup> Vano, miyo kiniihaniwa mutthu "oowaanyokha athiyana," nyuwo moosuwela eyo, okhala wira khula okathi kinikhala

oowaapwapwela athiyana, masi kahi nyuwo Axinn'aka. Miyo enikinanara enamuna athiyana a vano eniir'aya. Eyo ekeekhaii. Athiyana ooreera murima ahaana olipiheriwa.

<sup>87</sup> Masi kinniwerya wuupuwela okathi mulithi w'atithi aka nlelo waavar'aya muteko iwe, kaahaana okhala vate vale ni maasi n'itthu sikina, kaaniwoona aximwali yahaavikana miyakha muloko ni mithanu na miili, muloko ni mithanu na miraru, iwe n'alopwana oowunnuwa ntoko miyo vano, ehapalasiwe ene. Nto awo yaahaana owuukuluwiha ni waavaha ekafe yooriipa, wira erowe owanny'aya yaapeye yolya y'axiya aya. Oh, etthu siiso, miyo khwira, "Miyo..." Nla naari nuulumo naka nto, "Awo khamphwanela epholovolo yooreera yo owiivana." Eyo ekeekhaii. Ni miyo kaanaanyokha athiyana. Eyo ekeekhaii. Nto kihaana paahi owehaweha khula mweettelo vano, wira kihuupuweleke etthu emosaru.

<sup>88</sup> Tivo, masi vano, mutthiyana ooreera murima onikhala maniya vanlehani va mulopwana. Owo aahaana ottittimihiwa. Owo...Ame aka a muthiyana, amwaar'aka ti siiso, ni awo t'ophenteyasa. Ni kookhalana axinna ikonto sene aKristu kinaattittimih'aka vanci-ene. Masi awo—awo yaaweryaka ottittimiha ele Muluku aapanke awe, omaama ni pwiyamwene eekeekhai, ti yooreera. Owo etthu emosa mwa sooreera Muluku okhanly'awe oomuvaha mulopwana, aari mwaara. Ohiya woopowa, mwaara etthu emosa yooreerexa akhala-ru mwaara ooreera murima. Masi aahikhale, Salomoni oohimya, "Muthiyana ooreera murima onikhala maniya vanlehani va mulopwana, masi ole—ole ootakhala wala oohireera murima onikhala maasi mphomeni mwawe." Nto eyo ekeekhaii, eyo etthu yootepexa onanara yaarowa wiiraneya. Vano muthiyana ooreera murima...Nyuwo mwakhalana mwaara ooreera murima, munna, nyuwo mwaahaana omuttittimiha ni nttittimiho nuulupale. Eyo ekeekhaii, nyuwo mwaahaana wira siiso. Muthiyana eekeekhai! Nto, anamwane, nyuwo mwakhalana mai eekeekhai onikhala owaani ni wiilipiha wira ookhapeleleni, akhalihaka ikuwo sanyu sooreera, onooroihani oxikola, oniwiixuttihani itthu sa Yesu, nyuwo mwaahaana omuttittimiha mai uwo oosivela ni sothene siri mwa nyuwo. Nyuwo mwaahaana omuttittimiha muthiyany'owo, ayo, mulopwana, okhala wira owo ti mai eekeekhai.

<sup>89</sup> Awo anihimya ohisoma w'omwaakoni w'oKentucky. Nyuwo munnoona eyo mw'etthu ila y'eantisi mulataratoni. Amosa amosa w'aximai ale iwe yaamuwerya orwa nno oHollywood ni woouxuttihani nyuwo aximai a vano moota wo waalela an'inyu. Nyuwo mmuhiye mwan'awe avolowe mpaani ohiyu ni ikharari sawe sothene sootapanyeya, ni iyano... ipato, (nyuwo muniihana sai yeeyo?) itthu so wiipintari awo anihel'aya owiitho waya, ni evestiitu aya yothene yoowammwa epante emosa, n'ukhala ota ohiyu wothene, ohapaliwe ene, munna,

owo aamukuxa erintta emosa osulu wa mwiri nokeera ole nto khayaarowa okhuma-tho. Miyo kinimooleelani, owo amu... Ni nyuwo mwaakhalanne-ru yeeyo vakhani tho, mwaamukhalana Hollywood ooreera nno, ni elapo yooreera. Ti yeeyo. Eyo ekeekhai. "Mweererye okhala a vano paahi," owo—owo olavilavi wa xetwani.

<sup>90</sup> Vano, mwali ula, okathi omuwenhe aka, murim'aka waahivuuva ephome. Nto kuupuwela, "Ootakhaliwa."

Nto owo khwira, "Oh, mummutthuna sikaro, Billy?"

Miyo khwira, "Nnari, muthiyana." Miyo khwira, "Nkinimulya."

<sup>91</sup> Owo khwira, "Vano, muhimmye wira khamuniina." Awo yaatthunasa orowa wiina vano miyo nkaatthuna. Vano awo khwira wira waahikhala wiina iwe, yeeyo enihaniwa Sycamore Gardens.

Nto miyo khwira, "Nnari, miyo nkiniina."

<sup>92</sup> Owo khwira, "Vano, nyuwo khamuniina, khamunimulya sikaro, khamunwurya. Munrukuneya sai?"

<sup>93</sup> Miyo khwira, "Ahe, miyo onikisivela omiserya ni onikisivela oxaya." Eyo khiyaamucanli.

Vano owo khwira, "Mmukuxe sikaro ola."

Nto miyo khwira, "Nnari, muthiyana, kooxukhuru. Nkinimulya."

<sup>94</sup> Nto miyo keemenle vatripuni. Saanikhala estripu va aFord ale a khalayi, nyuwo munnuupuwela, nto miyo keemenle vatripuni, nikilanthi ene ikhatera s'ottuli, owo ni miyo. Nto owo khwira, "Munihimya wira khamunrowa omulya sikaro?" Khwira, "Nto hiyo aximwali ninniminyala woovikanani nyuwo."

Miyo khwira, "Nnari, muthiyana, kookupali wira nkinthuna wira eyo."

<sup>95</sup> Owo khwira, "Vano, nyuwo mwa nikenyeya!" Oh, wulu! Miyo kaatthuna okhala Bill muulupale ni ootakhala, vano miyo—miyo nkaatthuna hat'etthu ya nikenyeya. Moore, miyo kaatthuna okhala mulipa-oowana oothuveliwa, owo ti waari muupuwelo aka wa makhalelo. Vano khwira... "Nikenyeya! Nikenyeya!"

<sup>96</sup> Miyo nkaawerya ovilela eyo, vano miyo khwira, "Mukivahe miyo!" Kookonle ene ntata naka, miyo khwira, "Miyo kinoomooniha kaari nikenyeya wala nnari." Kimukumihha sikaro ole kipacerya omupattiha foofo. Vano, koosuwela wira nyuwo mu... Vano, nkinaakhula ele enuupuwel'anyu, miyo kinthokererya ohimya ekeekhai. Vapaceny'aka omupattiha sikaro ole, oolakela ene wira kimuvure ntoko simuvarenly'aka Bibilia ola, moone, kaahiiwa etthu yiraka, "Vuuuu!" Keererya-

tho, khuhiwerya ompixa mwaano mwaka. Vano miyo kipacerya wunla, kirihela etthu ile vathi. Awo khunakitheyasa. Vano miyo kitthikela owaani keettaka, kiwelelaka etturu, khukilaathi vate vale, kinlaka. Nto—nto yaari makhalelo owoopiha.

<sup>97</sup> Kinnuupuwela wira nihiku nimosa Atithi aka yaakhuruwela omuro n'axilopwana. Muhim'aka ni miyo, hiyo naahaana okuxa mwaatiya niwelaka nikhuruwelaka muro, niphavelaka isuupha wira oheliwe-mo wiskhi. Hiyo naanaakhela isentavo thanu wakhula etuusiya ya seiyo, mwaha w'ottotela mmuro. Nto Atithi aka yaari ni miyo, ni yaahikhalana iya soophottokowa sikhaani...Kookupali wira saari isuupha onsa nuusu [237 ml]. Ni waahikhala mwiri waapheliwe n'ittheke, ni Atithi aka...Nto mulopwan'ola aari ni yaawo, Mwenye Dornbush. Miyo kaahikhalana yawawe...Owo aarina ekalawa yooreerela, nto miyo kaatthuna kiphwanye xontte ni yoowo 'okhala wira kaatthuna orumeela ekalawa ele. Eyo yaarina eleemi yooreera nave yawaka khiyaarina hata eleemi. Hiyo naarina ithaapwa sa khalayi paahi wira neettihaneke. Nto owo aakihin'ye-ru orumeela ekalaw'ele...Tivo, owo aatotoxery'awe n'upaka milithi s'Atithi aka. Tivo owo...Awo khuhela mwetto osulu vamwirini vale, nto Atithi aka khuhela ntata mpeesani mwaya y'ottuli khikumihya esuupha yaamukhaani yoophottokowa ya wiskhi, khunvaha owo vano owo khiwurya, khwaavaha-tho Atithi aka n'awo khiwurya, vano awo khupweha varinttani yaamukhaani epantte ya mwiri yaakhumela ota. Nto Mwenye Dornbush khikuxa, khwira, "Ela va, Billy."

    Miyo khwira, "Kooxukhuru, miyo nkinwurya."

<sup>98</sup> Owo khwira, "Branham, nto ohinwurya?" Othene aya yaahaana okhwelana, otheya. Nto owo khwira, "Branham, nto ohinwurya?"

    Miyo khwira, "Nnari, mulopwana."

    "Nnari," Atithi aka khwira, "Miyo kimulenle nikeneyeya."

<sup>99</sup> Atithi aka ekiihanaka nikeneyeya! Miyo khwira, "Mukinnye esuupha eyo!" Vano miyo kikumiha ettiyelo ele vasulu vaya, kilakenle ene wira kiwurye, nto vapacenry'aka orukunxa, "Vuuuuu!" Kittikiha esuuph'ele kikhuma kitthyawelaka vapuwani ota voowaakuvaxa saawery'aka, kinlaka. Yaahikhala etthu yahaakihya owurya. Munnona? Nkaakhanle oohimiyaka wira kaari ooloka (miyo kaahilakela wira), masi ti Muluku, mahala, mahala ooreerexa yaakikhottiha wira itthu iye. Miyo kaanitthuna wira, mmansaka, masi Owo khaakihya wira tu.

<sup>100</sup> Ohoolo waya kimphwanya mwali mmosa okathi waarin'aka miyakha miloko miili ni miili, owo aari ooreera murima. Owo aari mwali aarowa okereja, Luterana ya w'Alemanya. Nsina nawe aari Brumbach, B-r-u-m-b-a-c-h, ninrwa mwa nsina Brumbaugh. Nto owo aari mwali ooreera murima. Owo khaamulya soona nnakhala owurya, wala—wala owo

khiinaka wala etthu p'itthu, mwali mmosa ooreera murima. Keetta ni yoowo okathi vakhani, nto miyo ka... Okathi ule, kaari oophiyaka miyakha miloko miili ni miili, kaahiphwanya musurukhu woophiyerya omuthuma Ford a khalayi, ni miyo... hiyo naanikhuma hothe. Nto vano, okathi uwo, khiyaakhanle hata ekereja Luterana vakhiviru, awo yaaroothama oHoward Park erowaka iwe.

<sup>101</sup> Nto vano awo yaari... murumeyi mmosa, yoowo okikhalinhe mulaleyi ekereja Patista Misionaria, Totori Roy Davis. Munna muthiyana Upshaw, yoowo ene aamurumme Munna Upshaw mulopwana wira arwe wa miyo, kiireke aamulenle owo mwaha wa miyo, Totori Roy Davis. Nto vano owo aamulaleya, ni aahikhalana ekereja Patista Yoopacerya, wala e—e... Kookupali wira khiyaari ekereja Patista Yoopacerya, nnakhala, yaari Mision... yihaniwa ekereja Patista Misionaria oJeffersonville. Nto owo aamulaleya nipuro nlo okathi ule, nto hiyo naanirowa ekereja ohiyu, vano... ni naanihokolowa. Vano miyo nkaaitakanihale mukereja, masi waanikisivela orowa paahi n'uwu. Okhala wira muupuwelo aka mulupale waari "orowa n'uwu," vanreerela kikhale naxariya.

<sup>102</sup> Vano nto keettaka ni yoowo, nto nihiku nimosi miyo... Owo aakhumme etthoko emosa y'atthu ooreera murima. Nto miyo kipacerya wuupuwela, "Nyuwo moosuwela, nyuwo moosuwela, nkirina y'opwetexa okathi wa mwali ule. Kehiyo—kehiyo yooreera, okhala wira ole mwali ooreerela, ni miyo ka masikhini ni—ni miyo..." Atithi aka yaahaavukuwa ekumi, ni miyo—miyo... Khiyaakhanle hata enamuna ya miyo ophwanya yolya y'omuvaha mwali ntoko ole, aalimalenle etthoko yooreera ni itapeti vathi.

<sup>103</sup> Miyo kinnuupuwela etapeti yoopacerya koonne aka, nkaasuwela yaari exeeni. Kaaheetta epante aya. Miyo kuupuwelela okhala etthu yooreerexa kaatonko aka woona kookhalaru. "Mwaha wa xeeni awo yaarow'aya ohela etthu ntoko ele vathi?" Yaari etapeti yoopacerya kaatonko aka woona. Yaari—yaari emosa wa seiya... Kookupali wira enihaniwa "itapeti sa ntthatto." Pooti evonyeiye ene. Etthu ntoko "muhaha" wala etthu etthawiwe, khwaataleliwa vathi. Yooreera yooripelela ni yooxeerya, nto nluwa nuulupale noopakwiwa eriyari aya, nyuwo moosuwela. Yaari etthu yooreera.

<sup>104</sup> Nto siiso miyo kinnuupuwela wira miyo—miyo kaahuupuwela wira kaahaana omuveka wira kimuthele, wala kaahaana okhuma ni omuhiya mulopwana oophwanela wira amuthele, mutthu aarowa okhala oomureerela, aawerya ophwanya yolya yo omuvaha ni aawerya okhala oomureerela murima. Miyo kaaniwerya omureerela murima, masi miyo—miyo—miyo kaaphwanya isentavo miloko miili khula ewoora. Tivo miyo nkaawerya omuvaha makhalelo ooreera sana. Nto miyo... Ni etthoko yothene hiyo naarin'ahu wira nikhapelele,

ni Atithi aka yaavukunwe ene ekumi, ni kaahaana waakhapelela othene aya, tivo miyo kaakhala okathi w'ovelavela sana.

<sup>105</sup> Vano miyo kuupuwela, "Ahe, etthu emosa entthuneya miyo wira omuhimeerya wira miyo—miyo...owo...Miyo—miyo nkinthika, okhala wira miyo kaanimuttittimiha sana wira kihihonone makhalelo awe ni omupweteiha okathi ni miyo." Nto vo miyo kuupuwela, "Akhala mutthu onrowa omukuxa khimuthela, khukhalana etthoko yooreera. Nto khino kaahiwerwe omukuxa, miyo kaamuwerya—miyo kaamuwerya osuwela wira aari ootteeleliwa murima."

<sup>106</sup> Nto siiso kuupuwela, "Masi miyo—miyo pahi—miyo nkinwerya omuhiya!" Nto miyo—kaaphwanyaneya ni makhalelo ootepa. Nto nihiku ti nihiku kuupuwela yeeyo. Tivo miyo kuuliw'aka muru vanci-ene omuveka wira kimuthele. Khula ohiyu kaanuupuwela, "Kinoorowa omuveka." Nto, okathi miyo, uh, exeni iyo, makuruthu, wala etthu enoorwa mw'awinyu...? Othene nyuwo axinna iwo khino mwaahikhalana musuwelelo mmosaru mwa yeeyo. Nto moonelo wootheihya, owiitho waka waaniviha. Miyo—miyo nkaasuwela. Nkaawerya omuveka.

<sup>107</sup> Vano miyo kinoona wira nyuwo munniikoha moota ophiyerenry'aka othela. Moosuwela? Kaamulepenle epaphelo khumuveka. Nto vano owo...Vano, khiyaari "Mwamuthiyana oophentiwa," yaahivikana vakhani (nyuwo moosuwela) epantte ya mphento yoovikana eyo. Khiwaari wi—wiwanana paahi, waari... Miyo—miyo khulepa, vooreerexa kaawery'aka.

<sup>108</sup> Nto kaaniwoova vakhani ame awe. Ame awe yaari...awo yaari oohirukuneya. Nto, masi atithi awe yaari mulopwana mmosa owuululava ooreera murima a Olanda, mutthu ooreera murima tu. Awo yaari mulipa-oolokiherya oxinna, mulipa oowehexexa ni ootthukula itravawu, muxipooroni, aphwanyaka itoolare imiya thanu khula mweri okathi ule. Vano miyo kiphwanyaka isentavo miloko miili khula ewoora, wira kimuthele mwan'awe. Uh! Miyo kaanisuwela wira khiyaakhalakhala yiiraneyaka. Nto ame awe yaari vanci-ene...Vano, awo muhano ooreera murima. Ni awo—awo yaari ntoko mmosa w'atthu ala a nikhuru nuulupale, nyuwo moosuwela, ni oopena vakhani, nyuwo moosuwela, nto tivo awo khayaakiphavela vanci-ne mwa khula enamuna. Miyo kaari mmiravo mmosa a mutakhwani, ni awo yuupuwela wira Hope aahaana weettana mmiravo ookhala ooreerela vakhani, nto miyo—miyo—miyo kinoona wira awo yaahaana exariya. Nto vano... Masi miyo—miyo nkuupuwela siiso okathi ule.

<sup>109</sup> Vano miyo kuupuwela, "Ahe, vano, nkinsuwela moota. Miyo—miyo nkinwerya waavekela atithi awe, ni miyo—miyo veekeekhai nkinrowa waavekela ame awe. Nto vano kihaana onvekela yoowo toko." Vano miyo khulepa epaphelo. Nto voosiis'ule kirowaka omutekoni, kaahihela mukaaxa mwa

ekureyo. Ekureyo. . . Hiyo naarowa okereja Namararu ohiyu, vano eyo yaari Esekunta voosiisu. Kaaheererya nihiku nothene Ttiminku omuleela wira kaatthuna othela, nto nkaawerya ominyala voophiyerya.

110 Vano nto miyo khuhela mukaaxa mwa ekureyu. Nto omutekoni nihiku nle khwiiraneya wira kaanuupuwela, “Ankhi ame awe yaakunxe ene ephelo ele?” Oh, wulu! Nto miyo kaahisuwela wira kaamutoloxiwa vakhala—vakhala wira aakuxa, ’okhala wira awo khayaakitthuna vanci-ene. Ahe, miyo kaamuvihiriwa.

111 Nto Namararu ile ohiyu okathi orwiiye aka, oh, wulu, miyo kuupuwela, “Kinrowa ophiya sai iwe? Vakhala wira ame awe aakuxa ephelo ele awo anoikipwapwela, vano kinroromela wira owo ohaakhela.” Miyo kimuveleelihenrye “Hope.” Nlo naari nsina nawe, Hope. Nto vano miyo khwira, “Miyo kinoolepa va paahi wira ti ya Hope.” Nto vano. . . Nto miyo kuupuwela wira khino awo khiyaakunxe ephelo eyo.

112 Vano miyo kaanisuwela wira nkaakhanle weemela vate ni woopa epusina wira owo okhume. Oh, wulu! Ni khula mmiravo ohinwerya ominyala voophiyerya wira arowe vatthokoni khumana mukhora khimukoherya mwali, kharina yo okhuma ni yoowo mwa khula enamuna. Eyo ekeekhaii pahi. Ovahuwa xeni. Mwiirelo woohikhala maana.

113 Nto vano khumweemexa Ford aka a khalayi, nyuwo moosuwela, nto kaahimwaariha othene. Nto vano miyo khurowa khumana mukhora. Ikharari, ame awe khurwa vamukhora! Kaahala ohikumihya iphumu, miyo khwira, “Eha—eha—ehaali anyu, Muhano Brumbach?” Ayo.

114 Awo khwira, “Ehaali anyu, William.”

Miyo kuupuwela, “Uh-oh, ‘William’!”

Nto—nto awo khwira, “Munoovolowa?”

115 Miyo khwira, “Kooxukhuru.” Miyo khuvolowa. Miyo khwira, “Hope ohanle wiilikanyihya?”

116 Nto okathi ene yoole va onoorwa ti Hope atuphaka mpaani, mwali oophiyaka miyakha muloko ni mithanu. Nto owo khwira, “Sai, Billy!”

117 Ni miyo khwira, “Sai, Hope.” Nto miyo khwira, “Muhanle wiilikanyihya wira nirowe okereja?”

Owo khwira, “Muhina mwa minutu mmosa paahi.”

118 Miyo kuupuwela, “Oh, wulu! Awo khakunxe. Awo khakunxe. Vaareera, vaareera, vaareera. Hope khaakhenle nave, vano sothene sinookhala sana, ’okhala wira aamukileela.” Vano kaahoona oreera.

119 Nto vo okathi okhumme aka okereja, kaahuupuwela, “Ankhi owo iira aakhenle ene?” Munnona? Ni nkaakhanle wiiwa ethu

Totori Davis aahimy'awe. Miyo kimuweha owo, nto kuupuwela, "Vakhala wira khino owo onimwiiwarela wira ahilavule, ni wira onookileela ikeekhai kakhumaru va, mwaha wo omuveka." Vano nkaawerya wiiwa etthu Munna Davis aahimy'awe. Vano—vano miyo kimuweha, nto kuupuwela, "Wulu, okinanara omuhiya, masi...Nto miyo—miyo...wooniheriwa wa itthu vekeekhai onimoorwa."

<sup>120</sup> Vano vakhumme ahu okereja nipacerya weetta vamosa mphironi, nirowaka owaani, nto—nto vano neetta mpakha vaFord a khalayi ule. Nto vano okathi wothe ne mweeri waamwaarya, nyuwo moosuwela, kimuweha ni owo aari ooreera. Mmiravo, kimuweha, nto kuupuwela, "Wulu, moota kaatthunaaka kikhalanne ene, masi kinoona wira nkinwerya."

<sup>121</sup> Nto vano keetta kirowaka ohoolo vakhani, nyuwo moosuwela, nto kaanithikela omuweha-tho. Miyo khwira, "Muno—munoona sai ohiy'ula?"

Owo khwira, "Oh, ka mukumi."

<sup>122</sup> Nto nimweemexa Ford ule a khalayi nipacerya okhuma, nyuwo moosuwela, epantte ekina, okompa khurwa owanny'awe. Nto miyo kaarowa mpakha vamukhora n'uwo. Miyo kuupuwela, "Nyuwo moosuwela, owo khino khaakhenle epaphelo ene, tivo kihaana oliyala. Kinookhalana esumana ekina ya mahala mwa khula enamuna." Tivo miyo kipacerya wona sana.

Owo khwira, "Billy?"

Miyo khwira, "Ayo."

Owo khwira, "Kihaakhela epaphelo anyu." Oh, wulu!

Miyo khwira, "Muhaakhela?"

<sup>123</sup> Owo khwira, "Ah-ha." Ahe, owo khutthikela eettaka paahi, khuhihimya hata nuulumo nikina.

<sup>124</sup> Miyo kuupuwela, "Muthiyana, mukileele etthu. Mukoomole ahiso mukileele etthu enuupuwel'anyu wa yeeyo." Nto miyo khwira, "Nyuwo moo—nyuwo moosoma?"

Owo khwira, "Ah-ha."

<sup>125</sup> Wulu, nyuwo moosuwela moota muthiyana onwery'awe woohiyani oothanana. Oh, miyo—miyo nkaatthuna ohimya siiso, nyuwo moone. Munnona? Masi, khula enamuna, nyuwo moosuwela, miyo—miyo kuupuwela, "Muhinihimeryani etthu?" Moone, nto kitthikela kirowaka. Miyo khwira, "Nyuwo moosoma yothene?"

Nto owo. . . [Nipuro vahiiitthu mufiitani—Mol.] "Ah-ha."

<sup>126</sup> Vano naahaattamela vamukhora, nto miyo kuupuwela, "Wulu, muhikiroihe mpithela, 'okhala wira miyo pooti ohiwerya otthyawa waavikana awo, vano mukileele naanaano va." Vano siiso miyo khukhala kilipelelaka.



127 Nto owo khwira, “Billy, miyo kaanithuna vanci-ene wira siiso.” Owo khwira, “Miyo kinnisiveliwa ni nyuwo.” Muluku areerihe munep’awe vano, owo ori Moovuwani. Owo khwira, “Miyo kinnisiveliwa ni nyuwo.” Khwira, “Kinoona wira nihaana waaleela axitithi ihu...axitithi mwah’owo. Khamunuupuwela siiso?”

128 Nto miyo khwira, “Oophentiwa, mwiiwe, nrowe nipacerye ela voovarihana nuusu ni nuusu.” Miyo khwira, “Miyo kinimwaaleela atithi inyu mwaaleela-ru ame anyu.” Kikakhelaka epantte yootepexa wa yoowo, wira opacerye.

Owo khwira, “Vaareera, nyuwo mwaaleela-ru Atithi aka toko.”

Miyo khwira, “Vaareera, miyo kinimwaaleela Ttiminku ohiyu.”

129 Nto siiso ohiyu wa Ttiminku khuphiya, kimuruuha owaani okhuma okereja nto miyo...Owo khukhala akiwehaka. Nto miyo kiweha, nto yaari ewoora ya yaneethanu na xexe ni minutu miloko miraru, waari okathi wa miyo orowa. Vano Charlie aakilanthi vameesa wawe voolepa, alepaka. Nto Muhano Brumbach okilanthi ene vanlothoni, amuttotthaka muthinto mmosa wa raafiya, nyuwo moosuwela, wala muura iya nyuwo munihel’anyu-vo itthu, nyuwo moosuwela. Miyo nkinsuwela moota munihan’anyu. Nto vano awo yaapaka emosa wa itthu seiyo. Nto Hope aanikiweha, n’ukitthukela mannyaari, nyuwo moosuwela, akikwatelaka atithi awe. Nto miyo...Oh, wulu! Miyo kuupuwela, “Ankhi awo yahimya wira, ‘Hoye’?” Vano miyo kipacerya weetta kirowaka vamukhora, miyo khwira, “Ahe, kinoona wira vanreerela miyo kirowe.”

130 Nto miyo khurowa mpakha vamukhora, ni—n’uwo khunarwa vamukhora ni miyo. Owo khula okathi aanirwaaka vamukhora n’ukiirela “ohiyu wooreera.” Vano miyo kipacerya orowa vamukhora, nto owo khwira, “Khamunrowa waaleela?”

131 Nto miyo khwira, “Uhum!” Miyo khwira, “Vekeekhai kinimweererya wira, masi miyo—miyo—miyo nkinsuwela moota kinrow’aka wira.”

132 Nto owo khwira, “Miyo kinootthika vano nyuwo muwiihanele ota.” Tivo owo khutthika khukihiya keemenle ene vaavale.

Nto miyo khwira, “Charlie.”

Awo khurukunuwa khwira, “Ayo, Bill?”

Miyo khwira, “Kinoowerya olavula ni nyuwo minutu mmosa paahi?”

133 Awo khwira, “Vekeekhai.” Awo khurukunuwa vameesa vaya. Muhano Brumbach khwaaweha, khimuweha Hope, khukiweha miyo.

Nto miyo khwira, “Mwaanitthuna okhumela mpithela?”

Nto awo khwira, “Ayo, miyo kinookhuma.” Vano awo khikhumela mpithela.

Miyo khwira, “Vekeekhai ohiyu wooreera, kuhiyo?”

Nto awo khwira, “Ayo, ti siiso.”

Miyo khwira, “Vekeekhai vanniviha.”

“Ti siiso vanniviha,” awo khukiweha.

<sup>134</sup> Miyo khwira, “Miyo nkinreere ovara muteko,” miyo khwira, “nyuwo moosuwela, hata matata aka aapacerya okhalana mamaku.”

Awo khwira, “Mmutheleke, Bill.” Oh, wulu! “Mmutheleke.”

<sup>135</sup> Miyo kuupuwela, “Oh, ti yooreera.” Miyo khwira, “Nyuwo munihimya ekeekhai, Charlie?” Awo khwira . . . Miyo khwira, “Charlie, nkawehani, miyo koosuwela wira owo ti mwan’inyu, ni wira mookhalana musurukhu.”

<sup>136</sup> Nto awo khookola moonoo khukivara ntata. Awo khwira, “Bill, mwiiwe, musurukhu kahi itthu sothene mwa makhalelo a atthu.” Awo khwira . . .

<sup>137</sup> Miyo khwira, “Charlie, miyo—miyo kimpchwanya isentavo miloko miili khula ewoora, masi onnikisivela n’uwo onnisiveliwa ni miyo. Ni miyo kinimooleelani, Charlie, wira miyo kinoovara muteko mpakha ala . . . mamaku ala olala mmatatani mwaka, wira kinvahe yolya. Kinookhala naxariya wa yoowo vanwery’aka okhala.”

<sup>138</sup> Awo khwira, “Miyo kinnaamini iyo, Bill.” Awo khwira, “Mwiiwe, Bill, miyo kintthuna kooleeleni.” Khwira, “Nyuwo moosuwela, ohakalala, khivantthuneyaxa musurukhu wira oruuhe ohakalala.” Khwira, “Mukhale oomureerela murima paahi. Ni miyo koosuwela wira munookhala.”

Miyo khwira, “Kooxukhuru, Charlie. Miyo vekeekhai kinimwiira siiso.”

<sup>139</sup> Vano waari okathi awe wo waaleela Amaama. Nkisuwenle moota iiraly’awe, masi hiyo khuthelana.

<sup>140</sup> Vano, okathi othelanne ahu, khanaarina hat’etthu, hat’etthu yo okhapelelana etthoko. Kinoona wira naarina itoolare piili wala tthaaru. Vano naahirentteri empa, yaakhala itoolare xexe khula mweeri. Naari nipuro naamukhaani, ni na khalayi na ikatthi piili. Vano ookhala aanivanhe olili mwaamukhaani waakhuneya. Kaatthuna kisuwele sinto ookhala mutthu otonko wona olili wookhuneya wa khalayi? Vano khuvahiwa yoowo. Nto miyo khurwa mpakha oSears and Roebucks khithuma meesa makhaani ni ikhatera xexe, nto khiya—khiyaapintariwe, nyuwo moosuwela, vano hiyo naathumme nilivaka vakhani-vakhani. Vano nto kirowa mpakha wa Mwenye Weber, aatumihia iyuuma sa khalayi, nto kithuma efikawu yo waapeela. Kaalince

isentavo miloko mithanu na miili, ni itoolare emosa n'itthu iyano saya. Nipacerya otthokiha etthoko. Kinnuupuwela kimukuxaka ni omupintari terevu mukhaterani, okathi waapintary'aka. Nto, oh, hiyo naari oohakalala, vano nto. Hiyo naahikhalana mmosa ni mukhw'awe, tivo yaathuney'aya yothene eyo. Nto Muluku, n'umoriwa Wawe ikharari ni oreera wawe murima, hiyo naari anaithoko eemiravo ootteelaxiwa murima yaaweryaneya okhala mulaponi.

<sup>141</sup> Miyo kisuwela ela, wira ohakalala murima khontthariha mwa mireerelo mikavi sa mulaponi soowaatta murin'anyu, masi otteeliwa wanyu murima ni epantte yoophwanenleni.

<sup>142</sup> Nto, nuvira okathi vakhani, Muluku khikhuruwa khureeriha etthoko ahu yaamukhaani, khukhalana mwammiravo. Nsina nawe naari Billy Paul, ori vamutekoni vaava naanaano va. Nto okathi vakhani okhuma vaavo, woophiyaka miyeeri muloko ni mmosa, Owo khunireeriha tho ni mwanamwane muthiyana iihaniwa Sharon Rose, nikumihiwe mwa nuulumo na "Ethutu ya Saroni."

<sup>143</sup> Nto kinnuupuwela nihiku nimosa kaahithukumanya musurukhu aka kaarowa wiitthyuuwa vakhani, kirowaka nipuro nimosa, Ntthiya Paw Paw, wira kamiserye. Nto kitthikaka . . .

<sup>144</sup> Nto okathi ene yoola . . . Kinoovitha orukunxa waka murima. Miyo khurukunxa murima. Nto khukhalihwiwa mulaleyi ni Totori Roy Davis, okereja Patista Misionaria, nto khukhala murumeyi ni kookhalana etapernakulu onlaley'aka-mo oJeffersonville. Nto miyo kaahoolela ekereja yaamukhaani. Nto miyo . . .

<sup>145</sup> Hata musurukhu, khuhoolela ekereja miyakha muloko ni mithanu na miili ni nkinakuxeke hata esentavo emosa. Miyo nkaamini oku- . . . Kihyaakhanle hata eparatho ya soovaha memmo. Ni sa namuloko kaarin'aka sa muteko, ni sikina, yaahikhala ekaaxa yaamukhaani ottuli w'empa, yaahimya wira, nipawe naamukhaani, "Imara sothene samwiireny'anyu mmosa w'xikhaani ala, mwaakiirela Yoomi." Nto vo eyo ti moota ekereja eliviw'aya. Naahikopha musurukhu wo oliva miyakha muloko, vano khuliviwa voohiphya miyakha miili. Ni nkinakuxeke yoovaha mwa hata enamuna.

<sup>146</sup> Vano nto kaahikhalana, oh, itoolare vakhani kaasunke aka wira kikhalane wiitthyuuwa waka. Owo aanivara muteko, nawe, Ofaapirika wa Ikamisa Fine. Mwali oophenteya ni oosivela. Nto nihiye nawe khino nrina etthapwe olelo, masi owo nlelo ori vamurimani vaka. Ni kinnuupuwela okathi owo aavarax'awe muteko wira akikhaliherye okhalana musurukhu woophiyeya wira kirowe ntthiya nenla kamiserye.

<sup>147</sup> Nto okathi waatthik'aka onthiyani, kipacerya woona, kikelaka oMishawaka ni South Bend, Indiana, nto kipacerya oweha ikaaro saarina mapawe ottuli, yaahimya wira, "Yesu Paahi." Nto miyo kuupuwela, "Eyo enikhala ntoko yotikiniha,

‘Yesu Paahi.’” Nto kipacerya wona mapawe ale. Ni yaari khula nipuro okhuma acinka, aFord, aCaddillac, ni itthu sikina, “Yesu Paahi.” Vano miyo kaatthara akina a yaawo, vano awo khuphiya ekereja emosa yuulupale. Vano miyo kisuwela wira yaari aPentekosite.

<sup>148</sup> Kaahinto wiiwa olavuliwa aPentekosite, masi awo yaari nikhuru “n’amasantu oophirikeya yaammaathi vathi ni yaakhuma nipheru mwaano,” ni itthu sothene kaahimeeriw’aka. Vano miyo nkaatthuna okhalana nata ni yeeyo.

<sup>149</sup> Tivo miyo kaaniwiiwa awo othene yiiseettihaka voowuukhuwa vale, nto miyo kuupuwela, “Kookupali wira kinookela.” Vano kimweemexa Ford aka a khalayi nto kikela, nto yiipasa ntoko muhinatoko anyu wiiwa mookhalaru! Nto miyo khusuwela wira saahikhala ikereja piili suulupale, emosa aya eniihaniwa P.A. ya J.C., ni P.A. ya W., anci-ene a nyuwo atthu khino munnuupuwela mitthenkeso iye sa khala- . . . Miyo kinoona wira sootakanxana, siniihaniwa vano, ni siniihaniwa ekereja Pentecostale Unida. Ahe, miyo koowiiwa amosa amosa a awiixuttihi aya. Nto awo yeemelanse vaavale, oh, awo yiixuttihi mwaha wa Yesu ni moota Owo aari-awe muulupale, ni moota itthu sothene saari-aya suulupale, ni mwaha wa “opatiso omosa wa Eroho Yowarya.” Miyo kuupuwela, “Awo anlavulasani?”

<sup>150</sup> Nto, nuvira okathi vakhani, mutthu mmosa khutupha khupacerya olavula ilavulelo. Ahe, miyo nkaatonko wiiwa etthu siiso kookhalaru. Nto va khurwa muthiyana mmosa atthyawaka vowiilipiha ntoko saawery’awe. Vano othene aya khuvenyasa khupacerya otthyawa. Nto miyo kuupuwela, “Ahe, munna, vekeekhai awo kharinasa inamuna mukereja!” Enyakulasaka ni ekhuwelasaka ni yiirasaka siiso, miyo kuupuwela, “Nloko xeeni nla!” Masi, nyuwo moosuwela, etthu emosa ya yeeyo, okathi waakilaathixaaka vale, yaamutepa okisivela. Yahikhala etthu yaakhala ntoko yooreera vekeekhai. Nto miyo kipacerya waawehasa. Vano eyo enakelela ohoolo. Miyo kuupuwela, “Kinoovilela ni yaale vakhani, ’okhala wira kino. . . kaattamenle vamukhora. Yakhala etthu enipacerya okhala yooththokeleleya, kinookhuma vamukhora kitthyawaka. Koosuwela vatthu ekaaro aka yeemexiw’aya, waattamela vakompa.”

<sup>151</sup> Nto kipacerya owiwa amosa amosa a alaleyi ale, yaari oosuwela ni oosoma. Vano, miyo kuupuwela, “Eyo ti yooreera.”

Vano waahiphiya okathi w’olya ohiyu, nto khwiiriwa, “Atthu othene arwe elye.”

<sup>152</sup> Masi miyo kuupuwela, “Nwehererye vakhani. Kookhalana etoolare emosa ni isentavo miloko mithanu na miili ni thanu wira kirowe owaani, nto miyo. . .” Owo waari musurukhu wothene kaarin’aka wa kasolina. Waatthuneya yoowo wothene wira okiroihe owaani. Ni kaahikhalana Ford aka a khalayi, aari Ford mmosa ooreera sana a khalayi. Khaari oohapuxiwa,

aari paahi ntoko ola vate va, masi oorumeeliwa. Nto owo... ni miyo vekeekhai kookupali wira Ford ule aanirowa imilya miloko miraru [48 Km] khula ewoora, masi veekeekhai saari muloko ni mithanu epantte *ila* ni muloko ni mithanu epantte *ila*. Nyuwo moone, otakanxa, munikhalana miloko miraru. Nto vano owo... Miyo kuupuwela, "Ahe, ohiyu ule kinoona wira kaarowa okhuma nto numala e..." Kaamukhala mwaha wa muteko w'ohiyu.

<sup>153</sup> Nto, oh, owo khwira, "Alaleyi othene, nihittharihaka muromolelo aya, arwe vaplataforma." Ahe, naahikhala oophiyaka imiya piili a hiyo iwe, miyo khuwela. Nto vano owo khwira, "Vano, hiyo khanrina okathi wira nyuwo othene mulaleye." Owo khwira, "Muwele va paahi muhimye nyuwo mw'ani ni otthu onikhum'anyu."

<sup>154</sup> Ahe, khuphiya okathi aka, miyo khwira, "William Branham, Patista. Jeffersonville, Indiana." Khuvira vale.

<sup>155</sup> Kaaniwiiwa akina othene aya yiisiihanaka, "muPentekosite, muPentekosite, muPentekosite, P.A. a W., P.A.J.C., P.A. W., P. . ."

<sup>156</sup> Miyo kiroovira vale. Kuupuwela, "Ahe, kinoona wira miyo ka nrattha noonanara." Vano miyo khukilaathi, khuwehererya.

<sup>157</sup> Nto, nihiku nle, awo yaahikhalanasa, alaleyi ooloka amiravo vale, ni awo yaahilaleyasa voowerya-vo. Nto vo awo khwira, "Ole onrowa oruuha mutthaka ohiy'ula ti..." Kookupali wira awo yaamwiihana, "Mukhulupale." Ni arumeyi aya, ohiya "Reverendu," yaari "Mukhulupale." Vano awo khimuruuha mulopwana mmosa mutokweene ooriipa vale, ni owo aarina emosa wa ikasako iye sa alaleyi sa khalayi. Miyo kinoona wira nyuwo khamunatoko woona emosa. Mwiila woorekama wa epompa ottuli, nyuwo moosuwela, ni mukala wa manri oothererya, ni owo aarina paahi mukopwe mukhaani paahi wootteela wa ikharari mmuruni mwawe. Mutthu mutokweene voomoriha ikharari, owo aaruule so, nyuwo moosuwela. Nto owo khweemela vale khurukunuwa. Ni vaavo alaleyi othene yaalalenry'aya mwaha wa Yesu ni muulupale...moota Owo aari-awe muulupale, ni sikina, mulopwan'ole mutokweene aakunxe yoosoma awe mwa Yobi. "Mwaari vai okathi waapattux'aka elapo, wala okathi ittheneeri sooxaka siip'aya vamosa ni aana a Muluku yaattap'aya mwaha w'otteeliwa murima?"

<sup>158</sup> Nto mutokweene owo oohaawa, miyo kuupuwela, "Xeeni ohikelihw'awe mmosa a alaleyi ale amiravo osulu iwe wira olaleye?" Muulupale...nipuro nlo naari noosareiwa ni noophunyeya. Nto miyo kuupuwela, "Ankhi ehiireliweni siiso?"

<sup>159</sup> Vano nto mulopwan'ola mutokweene, ohiya olaleya ele yiiraneya elapo ya vathi va, owo khupacerya olaleya etthu yiiraneya Wirimu okathi wothene. Ahe, khupacerya ni Yoowo wopaceryani—wopaceryani w'okathi, khimuttikiherya Orwa

wa Nenli mpakha ekhweyi yoowaataleleya. Vano, kiira kihinatoko wiiwa olaleerya siisaale kookhalaru! Okathi ene yoole Eroho khummana, owo khutuphela osulu siisaale *sale* khikumaniha ikhosa sawe, khuttikinya makhata awe khurowa otthenyekuwaka vaplataforma vale, khwira, “Nyuwo khamurinasa opuro oniphiyerya vasulu va wira kilaleerye.” Nto owo aahikhalana opuro munci-ene ovikana sirinaaka va.

<sup>160</sup> Miyo kuupuwela, “Vakhala wira Eyo ennimwiiriha mulopwana mutokweene wira siisaale, ankhii yaarowa wira exeeni Eyo yaakenle mwa miyo?” Miyo—miyo kuupuwela, “Khino miyo kinniphavela vakhani ya Yeeyo.” Vano, owo khikhuma vale, miyo kaahimoonela othunku munci-ene mutokween’ole. Masi, okathi okhummy’awe, kaaniisoonela othunku mmansaka. Nto kimuweha owo okhuruwaka vale.

<sup>161</sup> Miyo kikhuma ohiy’ule, nto kuupuwela, “Vano, voosiisu aya nkinrowa omuhiya hata mutthu osuwela vatthu, miyo k’ani.” Vano miyo khurowa, nto ohiy’ule miyo khuphita ekalsa aka. Kikuxa e...khurowa omatta wa nakhuwo wira karupe, nto khurowa khithuma iphawu soorupa. Nyuwo... Kithuma nikuttha nene ni isentavo thanu. Waahikhala mpompe ohitto iwe, kirika maasi vakhani. Vano kaanisuwela wira awo yaamukhala wa miyo okathi vakhani-tho, vano khurika maasi vakhani-tho khiwurya, nto khurowa khikhuura iphawu saka. Khutthika khiwurya-tho maasi makina. Khurowa mmatta mwa nakhuwo, kikuxa ikhukulu piili khwaatala ekalsa aka yoototthiwa ya nxotte ya malepa vale, kiphita-phita vakhukuluni.

<sup>162</sup> Nto, ohiy’ule, kaahivekela voophiyaka ohiyu wothene. Miyo khwira, “Pwiya, exeeni ila okenly’aka-mo? Miyo nkaatonko owoona atthu anatiini siisaale kookhalaru.” Nto miyo khwira, “Mukikhaliherye osuwela enihimya exeeni yothene ela.”

<sup>163</sup> Nto voosiisu aya miyo khuphiya iwe. Khulattuliwa wira nalye voosiisu. Vekeekhai, miyo nkaatthuna orowa olya n’awo, okhala wira miyo nkaarina hat’etthu y’ohela mwa soovaha. Nto miyo khutthika paahi. Nto voosiisu aya okathi okenly’aka, vano (kaahikhuura iphawu saka kamosa kamosa), khukilaathi. Vano awo yaarisa vamikrofoni. Nto kiira kihinatoko wona mikrofoni khalayi, ni kaanoova etthu ile. Vano awo... Nto owo waahikhalana mukhoyi mwaamukhaani wothomeiwa osulu nno, ni waakhuruwa. Ntoko mikro iye, sootthukeleliwa. Nto owo khwira, “Nsana ohiyu, vaplataforma, aahikhala mulaleyi mmosa mmiravo va, muPatista.”

    Miyo kuupuwela, “Uh-oh, miyo koophwanyiwa nto vano.”

<sup>164</sup> Nto owo khwira, “Owo aari mulaleyi oomalela oyeva vaplataforma. Nsana nawe naari Branham. Ookhala onsuwela vatthu vari-awe? Mmuleele arwe, hiyo nintthuna wira aruhe mutthaka wa voosiisu.”

<sup>165</sup> Oh, wulu! Kaawanre ekamiseeti yaamukhaani, ni ekalsa yootthaviwa ya malepa, nyuwo moosuwela. Nto hiyo aPatista ninaamini wira nyuwo muhaana owara efaatu, wira murowe vapulpitu, nyuwo moosuwela. Vano... Nto miyo—miyo khukilaathi khumaala sana. Nto okathi ene yoowo... Awo yaahikhalanasa Onikela epheyo wu (muthukumano aya wa elapo yothene) alipa-ooriipa khayaawerya orwa vakhalaru wira yiiraneya Okuusini. Awo yaarinasa alipa-ooripa iwe, ni miyo kaari a Okuusini, kaari oolipa murima nlelo, moone, koono wira kaari oolokaxa omuvikana mutthu mukina. Nto yaahiiiraneya okhala voosiisu ule, okilanthi ene vakhiviru ni miyo aahikhala mu—mulopwana mmosa ooriipa. Vano miyo kaahikhalaathi kinamuweha yoowo. Miyo kuupuwela, “Ahe, owo munnaa.”

<sup>166</sup> Nto owo khwira, “Ookhala onsuwela vatthu vari William Branham?” Miyo kuurama vakhukuluni *sa*. Vano owo khwira, khuhimya emara ya nenli, khwira, “Ookhala vate vo” (owo khupurula mikro iya sikhaani) “onsuwela vatthu vari William Branham? Mmuleele wira hiyo ninnimuphavela vaplataforma wira aruue mutthaka wa voosiisu. Owo mulaleyi muPastista onikhuma epantte y’okuusini oIndiana.”

<sup>167</sup> Miyo kikhala oomaala paahi oowuurama, nyuwo moosuwela. Khaawa aakisuwela, khula enamuna. Mmirav’ole ooriipa khukiweha, khwira, “Nyuwo moosuwela vari-awe?”

<sup>168</sup> Miyo kuupuwela. Miyo—miyo kaahaana wootha ahiso wira etthu. Vano miyo khwira, “Muuramele va.”

Owo khwira, “Ayo, mulopwana?”

Miyo khwira, “Kintthuna kooleleni etthu.” Miyo khwira, “Miyo—miyo ka yoowo.”

Owo khwira, “Ahe, nwele vasulu vale.”

<sup>169</sup> Nto miyo khwira, “Nnari, nkinwerya. Moone,” miyo khwira, “Miyo kiwanre ekalsa ela yaamukhaani ya nxotte ya khalayi ya malepa ni ekamiseeti ila yaamukhaani.” Miyo khwira, “Nkaawerya owela vale.”

<sup>170</sup> Owo khwira, “Atthu ale kharina naata moota siwanry’anyu. Nwele vale.”

Miyo khwira, “Nnari, nnari.” Miyo khwira, “Mmaale, muhihimye hat’etthu vano.”

<sup>171</sup> Nto awo khutthikela vafoonini minuuta mmosa, khwira, “Ookhala onsuwela vatthu vari William Branham?”

<sup>172</sup> Owo khwira, “Ola ori va! Ola ori va! Ola ori va!” Oh, wulu! Vo miyo khuwela kiwanre-ene ekamiseeti ile yaamukhaani, nyuwo moosuwela. Ni va miyo . . .

<sup>173</sup> Owo khwira, “Nwele, Mwenye Branham, nintthuna wira muruue mutthaka.” Oh, wulu, ohoolo wa alaleyi ale othene,

uhm, athu ale othene! Vano miyo khuwela murima-murima, nyuwo moosuwela. Owiitho waka woosweerya-wo, ni maaru aka evihaka. Vano miyo khuwela murima-murima, ekalsa ya nxotte ya malepa ni ekamiseeti, mulaleyi, mulaleyi muPatista orowaka vamikrofoni, kiira kihinatoko woona, nyuwo moone.

<sup>174</sup> Nto miyo khweemela vasulu vale, miyo khwira, “Ahe, miyo—miyo—miyo nkinsuwela ela.” Miyo kaamwiivelaveliha, oottetemerya sana, nyuwo moosuwela. Nto—nto khiphiya va mwa Luka 16, nto kuupuwela, “Ahe, vano...” Nto miyo—miyo kipacerya mwaha, “Vano owo aahivenxa maitho awe mookhwaani, khunla.” Nto miyo... Vano miyo—miyo khupacerya olaleya, nyuwo moosuwela, nto kipacerya olaleya khoona sana vakhani. Nto miyo khwira, “Thaaciri aari omooroni, nto owo khunla.” Moolumo awo makhaani mararu, ntoko sirinaaka mitthaka minci-ene siiso, “Nyuwo Munnaamini Ila,” ni “Mulavule Ni Mwala,” nyuwo mookiwa olaleya seiyo. Nto miyo kaarina, “Vano owo aahinla.” Vano miyo khwira, “Khaavo anamwane iwe, vekeekhai nnari omooroni. Vano owo aahinla.” Miyo khwira, “Khasikhanle ithutu iwe. Vano owo aahinla. Khokhanle Muluku iwe. Vano owo aahinla. Khokhanle Kristu iwe. Vano owo aahinla.” Vano miyo khunla. Yookhala etthu yaakivanre. Wulu! Oh, wulu! Numala, nkisuwenle yiiraneiyee. Okathi kikhanly’aka sana mmansaka, keemenle vate. Athu ale khupacerya okhuwela n’unyakula ni wunla, nto miyo, naahikhalana okathi muulupale.

<sup>175</sup> Okathi oronw’aka vate aahikhalana mulopwana mmosa aakaattamenle aawanre ekofiyo yuulupale y’oTexas, ipoota suulupale, khurwa, khwira, “Miyo ka Mukhulupale *Lexe-lexe*.” Mulaleyi, ipoota sa makhampusi a inyompe, ikuwo sa makhampusi a inyompe.

    Miyo kuupuwela, “Ahe, ekalsa aka ya nxotte ya malepa khenanaranxe nto.”

<sup>176</sup> Khwira, “Kintthuna wira murwe oTexas muhoolele muhakalaliho.”

<sup>177</sup> “Uh-hum, mukihye kilepe owo, mwenye.” Vano miyo khulepa siiso.

<sup>178</sup> Va onoorwa mulopwana mmosa owanre ene, ikalsa iya sa kolfi, seiyo saawariwaka wira ottikihiwe kolfi, nyuwo moosuwela, aahikhalana ekalsa ele ntoko epalawu. Owo khwira, “Miyo ka Mukhulupale *Lexe-lexe* a oMiami. Kintthuna o . . .”

<sup>179</sup> “Wulu, khino owara kahi t’ontthuneyaxa.” Miyo khuweha, kuupuwela, “Vaareera.”

<sup>180</sup> Vano miyo kikuxa ithu iya, khurwa owaani. Amwaar’aka khikumana ni miyo, awo khwira, “Exeeni enookhalihani ntoko ooteeliwa murima, Billy?”



181 Miyo khwira, “Oh, kiroosuwela ekereemi ya leethi. Wulu, ti yoorereexa muhiltonko anyu woota. Atthu ale khaanuleliwa muru etiini aya.” Nto, oh, miyo khwaaleela yothene eyo. Nto miyo khwira, “Vano nkawehani va, mwaar’aka, yooempwa yothene ya malattulo. Atthu ale!”

Awo khwira, “Awo kahiyo masantu oophirikeya, ti yaawo?”

182 Miyo khwira, “Nkisuwenle muthinto xeni w’atthu oophirikeya, masi awo aakhalanasa etthu miyo kaathun’aka.” Munnona? Miyo khwira, “Eyo—eyo t’itthu emosa kinkupaly’aka.” Miyo khwira, “Koomoona mulopwana mmosa mutokweene, a miyakha miloko mithanu na mixexe, okhala-tho mmiravo.” Miyo khwira, “Miyo kiira kihinatoko wiiwa elaleeryo siisaale kookhalaru. Vano, nkinamooneke muPatista olaleerya siisaale.” Miyo khwira, “Awo anoolaleeryasa mpakha waamalela ephumu, n’ukhunela makutha aya vathi, n’utthikela-tho ovenya, ni waakhela ephumu aya. Munooowerya owiwa voorakamela ikwarterawu piili, nlelo elaleeyaka.” Nto miyo khwira, “Miyo—miyo nkinaiwe etthu iyo kookhalaru.” Nto miyo khwira, “Awo annilavula elavulelo yoohisuweliwa, ni mukina khunahimya etthu awo anlavul’aya. Nkinaiwe etthu iyo kookhalaru!” Miyo khwira, “Munoorowa ni miyo?”

183 Awo khwira, “Iy’aka, okathi okithenly’anyu, miyo kinookhala ni nyuwo mpakha okhwa onivalaanya.” Awo khwira, “Kinoorowa.” Awo khwira, “Vano, nmimwaaleela axitith’ihu.”

184 Nto miyo khwira, “Ahe, nyuwo mwaaleele ame anyu ni miyo kinimwaaleela ame aka.” Vano hiyo... Miyo khurowa khwaaleela Ame aka.

185 Ame aka khwira, “Ahe, vekeekhai, Billy. Etthu p’itthu Apwiya awiihanenly’ayani wira mwiire, murowe mwiire.”

186 Nto vano Muhano Brumbach khuvekela wira kirowe owanny’awe. Khurowa. Owo khwira, “Exeeni ila nyuwo munihimy’anyu?”

187 Nto miyo khwira, “Oh, Muhano Brumbach,” miyo khwira, “nyuwo othene khamunawooneke atthu awo.”

Awo khwira, “Mmaale! Mmaale!”

Miyo khwira, “Ayo, muthiyana.” Miyo khwira, “Mukilevelele.”

Vano awo khwira, “Nyuwo munnisuwela wira nle nikhuru na masantu oophirikeya?”

188 Miyo khwira, “Nnari, muthiyana, nkaasuwela eyo.” Miyo khwira, “Awo—awo vekeekhai atthu ooreera murima.”

189 Awo khwira, “Muupuwelo xeeni! Nyuwo munuupuwela wira mwaammukuxa mwan’aka mmuroihaka eriyari y’etthu ntoko eyo!” Khwira, “Yoochifayi! Eyo kehiyo hat’etthu masi

ikokhola ikereja sikina siitthenly'aya ota." Awo khwira, "Ti yeeyo! Kamunimuroiha mwan'aka ota siiso."

<sup>190</sup> Nto miyo khwira, "Masi, moosuwela, Muhano Brumbach, muhina mmurimani mwaka kinnoona wira Apwiya antthuna wira kirowe n'atthu ale."

<sup>191</sup> Awo khwira, "Mutthikele okereja wanyu mpakha awo okhalana owerya wo wooliveryani empa ya pastore, ni mwiireke ntoko mutthu onthokelela vakhani mano." Khwira, "Nyuwo khamunimukuxa mwan'aka mmuroihaka iwo."

Miyo khwira, "Ayo, muthiyana." Miyo kirukunuwa kikhuma.

<sup>192</sup> Vano Hope khupacerya wunla. Owo khikhumela ota, khwira, "Billy, voohicali etthu Amaama enihimy'aya, miyo kinookhala ni nyuwo." Oreerihawe murim'awe!

Nto miyo khwira, "Oh, ti yooreera, mwaar'aka."

<sup>193</sup> Nto miyo khuhiya khuvira. Awo khiyaamuhiya mwan'aya orowa n'atthu ntoko ale 'okhala wira "Khiyaari hat'etthu masi ikokhola." Nto siiso khuhiya khuvira. Owo waari ovonya wootepexa kiiraly'aka khookhalaru, emosa wa sootepexa.

<sup>194</sup> Okathi vakhani ohoolo waya, miyakha vakhani ohoolo waya, anamwane khurwa. Nto nihiku nimosi hiyo naari... Elapo khusareya maasi, 1937. Elapo khusareya maasi. Nto awihu... Miyo kaamweetelela okathi uwo nto kaaniilipiha voowerya waka wira kaakumihe atthu mmaasini, ipa siphomowaka. Ni amwaar'aka yoomi khuwereiwa, n'awo yaahiwereiya sana, owereiya sana eretta ya masasu. Vano awo khwaakuxa... Exipiritali yaahisarya vahaaweryaney'aya waapweha memme, vano hiyo khwaakuxa khwaaroiha wa—wa kuvernu weiwo waari-wo esalawu ota iwe. Nto vano miyo khwiihaniwa wira kihokolowe. Nto miyo okathi wothene kaakhala mmurathhini, ni nakalawa oosuwela sana, vano miyo keererya waakuxa atthu, owoopola mmaasini. Vano nto kaani... mmosa...

<sup>195</sup> Awo khukiihana, khwira, "Yookhala empa wu Ephiro Chestnut, ehanle omora. Ookhala mai mmosa nnikhuru n'anamwane memmo," khwira, "moona wira ekalawa anyu, mutooro anyu onniwerya waaphwanya."

Miyo khwira, "Vaareera, kinimwiira sothene sinwery'aka."

<sup>196</sup> Nto miyo, kiphovaka mawimpi ale. Mukuso waarophweya iwe, nto, oh, wulu, e... eworokholaka epooma paahi. Nto miyo kaanivaha sothene saawery'aka, nto vookiserya kiviraka iphiro soophunyeya ni mapuro. Vano kiphiya iwe waattamela vatthu vaari mukuso ole wa khalayi, maasi eviraka vale. Nto khumwiiwa mutthu wunla, nto kimoona mai mmosa eemenle-ene mpithela. Ni yaahikhala mawimpi ale maalupale eviraka siisaale. Ahe, miyo kuruwa ephiro *yeela* vowaakuxa saawery'aka, khuttemula muro khutthika kuruwa nipuro

nenle. Kaahiwerya weemexa ekalawa aka m'okathi wira kitthukwelele vanripuni, na nivatta, na nivatta na mukhora ahiso nivatta na mpithela. Nto kivolowa kitthyawaka kimukuxa mai kimuhela mpaani mme, ni anamwane anli wala araru. Vano kitaphula ekalawa aka kimukuxa mpakha... kitthikaka. Kikumela ohitto iwe, kimuroiha mukerekhere, nipuro noophiyaka emiilya ni nuusu [2.5 Km] nno ni nno wa mpooma, mpakha omuphiha mukerekhere. Nto vo okathi ophin'ye aka iwe, owo aahihileya. Vano owo aahipacerya... owo aamunla, "Mwan'aka! Mwan'aka!"

<sup>197</sup> Ahe, miyo kuupuwela wira owo aahimya wira aamuhin'ye mwaana mpaani. Oh, wulu! Miyo khuhokolowa-tho okathi athu yeerery'aya omukhapelela. Nto, khupiyererya osuwela wira, aari... ahiso owo aatthuna osuwela mwan'awe aari vai vale. Aahikhala mwammiravo oophiyaka miyakha miraru, nto kuupuwela wira owo aamuhimya mwaana onaamwa wala etthu siiso.

<sup>198</sup> Nto siiso miyo khutthika khuphiya iwe. Nto okathi okunx'aka ekalaw'ele khukela mpaani nkaawenrye omuphwanya hata mwaana, vano nipithela khuremuwa n'empa khumora. Vano miyo kitthyawa voowaakuvaxa kikuxa e—ekapatti yaattemiha ekalawa aka, khukela mukalawani, kipurula eyo kitaphula.

<sup>199</sup> Vano khukiroiha ota waavira muro muulupale nto. Nto yaari waattamela ewoora yanamuloko n'imosa ni minutu miraru y'ohiyu, ni amoraka maralala makhaani ni etthapwe paahi. Vano miyo khuvara mukhoyi wo ovenyiha keererya opurula mwaatiya, nto owo khuwaavenya, vano keererya vano owo khuwaavenya, vano keererya-tho. Kiphiyaka ohoolo wa muro ole, ekhwarara ohoolo waka wene. Ni miyo kaaniilipiha nave, nto kuupuwela, "Oh, wulu, va—va t'eri emalelo aka! Ti yeela!" Nto miyo kaaniilipiha sana. Nto miyo khwira, "Pwiya, xontte muhikihiye kikhwaaka siisa," vano miyo kaanipurula n'upurula.

<sup>200</sup> Vano ekitthikela, "Ankhi nikuttha nle na ikokhola muhitthunne anyu orowa-wo?" Munnona? Ah-ha.

<sup>201</sup> Miyo khuhela ntata naka vamwaatiyani tho, nto khwira, "Muluku, mukimorele ikharari. Muhikihiye waahiya amwaar'aka ni mwan'aka siisa, n'awo ari-ene iwe aretta! Xontte!" Vano miyo kaanithikela kipurulaka siiso, nave owo khuwaavenya. Ni kaaniwerya wiiwa otturuma vathi vale, 'okhala wira miyo... Minutu vakhani paahi, nto, oh, wulu, yaamukhala emalelo. Nto miyo khwira, "Pwiya, Nyuwo mwakilelelela-ru, miyo kinimooleelani wira kinimwiira etthu." Kikokhora mmwaatiyani memme vale, ni maralala makhaani ekimanaka owiitho. Miyo khwira, "Miyo kinimwiira etthu p'itthu Nyuwo muntthun'anyu wira kiire." Nto miyo khipurula-

tho, vano owo khuyenya. Nto kincererya weettiha ntoko saawery'aka, vano vookiserya khuphiya mukerekhere.

<sup>202</sup> Nto khutthika wira kaphwanye ekamiyawu, ekamiyawu yo weetelela. Nto kuupuwela mwaha wa . . . Yaahikhala amosa amosa a awo yiirale, "Ei, kuvernu onoomalaru opuruliwa ni maasi." Amwaar'aka ni mwaana memmo, aana owanli.

<sup>203</sup> Vano miyo khurowa wa kuvernu vowaakuvaxa saawery'aka, ni maasi yaahisarya voophiyaka inawo muloko ni thanu [4.5 m] moowiixa mothene mme. Aahikhala majoori vale, nto miyo khwira, "Majoori, exeeni yiiraneieye ni exipiritali?"

Khwira, "Vano, muhixanke. Mookhalana mutthu mme?"

Miyo khwira, "Ayo, amwa—amwaar'aka aretta n'anamwane anli."

<sup>204</sup> Owo khwira, "Awo othene aakhuma." Khwira, "Arisa mukampoyini mwa mahuta vano anrowa oCharlestown."

<sup>205</sup> Miyo khutthimaka, khikuxa mwaatiya aka nto . . . kiireke khikuxa ekaaro aka, ni mwaatiya aka ottuli waya, khutthimaka kirowaka wuuwu . . . Nto vo miratthi saahincerereya mpakha voophiyaka imilya piili ni nuusu wala tthaaruu [4 wala 5 Km]. Nto ohiyu wothene miyo kaaneererya o . . . Amosa amosa wa awo khwira, "Ekaruwaaxi, kampoyi, ookhumpwa muxipooroni iwe vaponti ya kavaleti."

<sup>206</sup> Ahe, kaaphwanyaneyya ootthiyaiwa vasisironi yaamukhaani, khukhala vaavale mahiku mararu. Kaahikhhalana okathi munci-ene w'otthokelela sinto Iye saari ikokhola wala nnari. Kitthikelaka paahi, "Amwaar'aka ari vai?"

<sup>207</sup> Vookiserya okathi waaphwannye aka, mahiku vakhani numala okhuma khulapuwa, awo yaari ottaiwene oColumbus, Indiana, mw'Autitooriyo Patista weiwo awo yaapakanse aya ntoko e—exipiritali, ikatthi s'arettta mmoolilini sikhani sa kuvernu. Vano miyo kitthimaka kaarowelaka vowaakuvaxa ntoko saawery'aka, kitthunaka ophwanya vatthu vaari-aya, kikhuwelaka, "Hope! Hope! Hope!" Vano miyo khuweha, vano awo yaari vale yaataleliwe ene voolilini mwaamukhaani, nto ekohowa yaahaakela.

Awo khuvenxa ntata naya naamukhaani na makhuva, nto khwira, "Billy."

Vano miyo khwaatthimakela, ni miyo khwira, "Hope, mwaar'aka."

Awo khwira, "Kinooneya okhala oonanara, kahiyo?"

Miyo khwira, "Nnari, mwaar'aka, munnooneya okhala sana."

<sup>208</sup> Mwa miyeeri mithanu na mosa hiyo naahivara muteko ni sothene saari mwa hiyo, nitthunaka wira noopole ekumi aya, masi yaamutthikela atepaka.

209 Nihiku nimosa kaamweettelela ni raatiyu aka aari ootthukuliwa-ene, nto miyo koono wira kaahiiwa wiiriwa, mulikarele oraatiyuni, khwira, “Ya William Branham, onniphaveliwa oxipiritali naanaano va, mwaar’awe onookhwa.” Khurowa kaakuvaka kitthikelaka oxipiritali vowaakuvaxa ntoko saawery’aka, khimupattiha luuxo ooxeerya ni esireni, khurowa. Nto vo miyo—khuphiya oxipiritali khweemela, khuvolowa kitthyawaka. Kiviraka o—oxipiritali, miyo khumoono mwaapar’aka mwaamukhaani a muteko kaamiserya vamosa ni yoowo, hiyo khutthimaka hothe ntoko amiravo, Sam Adair.

210 Totori Sam Adair, owo t’ule yaamurwenle yoowoona naanaano khimuleela mwaha w’eklinika. Nto owo khwira, akhala ohovenrye yoowoona ele, mmwiihane wira aakhele, mwatthuna osuwela sinto yaari ekeekhai wala nnari.

211 Nto siiso vo owo khikhuma siisaale, n’uwo aahikhalana exapheyo awe mmatatani. Owo khukiweha khupacerya wunla paahi. Vano kimutthimakela, kimupatikha. Owo khuhela miyoono sawe mwa miyo, khwira, “Billy, animookhwa.” Owo khwira, “Kinnoona othunku. Kihiri sothene saawery’aka, kaahikhalana aratti ni itthu sothene.”

Miyo khwira, “Sam, vekeekhai awo khanookhwa!”

Khwira, “Ayo, animookhwa.” Nto owo khwira, “Muhivolowe mmo, Bill.”

Nto miyo khwira, “Kihaana ovolowa-mo, Sam.”

Nto owo khwira, “Muhiire. Muhiire, koovara metto muhiire.”

Miyo khwira, “Mukihiye kivolowe.”

Khwira, “Kinoorowa ni nyuwo.”

212 Miyo khwira, “Nnari, nyuwo muhale vate va. Kintthuna kikhale n’awo mwa minutu saya sookiserya.”

Khwira, “Awo t’ohiisuwela.”

213 Miyo khuvolowa mpaani. Vano mfurumeera aakilanthe vaavale, vano owo aamunla ’okhala wira owo ni Hope yaari axipatthani oxikola. Nto vano miyo khuweha, vano owo khupacerya wunla, khuvenxa ntata nawe. Khupacerya okhuma vale.

214 Vano miyo khwaaweha, khwaatatha. Awo yaari vale, yaahivukuwa okhuma ilivura imiya piili ni miloko miili, mpakha miloko mithanu na mosa [55 Kg mpakha 27 Kg]. Vano miyo—miyo khwaatatha. Nto miyo kakhalaru mukumi khuphiya miyakha emiya, nkinkhalakhala kiliyalaka etthu yiiraneieye. Awo yaaroorukunuwa, nto maitho ale maalupale ooreera khukiweha. Awo khutheya. Khwira, “Mukiihanenleni mukitthikhaka, Billy?”

Miyo khwira, “Mwaar’aka, kinoomalaru omwiiwa ’raatiyu.”

<sup>215</sup> Miyo kaahaana ovara muteko. Hiyo naanilokihwiwa voowaatta ni itoolare imiya sene s’omuliva tothoro, nave hat’ethu yooliva-no. Nto miyo kaahaana ovara muteko. Vano miyo kaanaathotola imara piili wala tthaaru khula nihiku, ni khula ohiyu, vano okathi ule aari-ene siisaale.

Miyo khwira, “Munihimyani mwiraka, ‘Owiihanani’ ‘wira mutthike?’”

<sup>216</sup> Awo khwira, “Bill, nyuwo moolaleerya Eyo, nyuwo moolavula Eyo, masi khamunathokelele wira Eyo exeeni.”

Miyo khwira, “Munihimya exeeni?”

<sup>217</sup> Awo khwira, “Erimu.” Awo khwira, “Nkawehani,” awo khwira, “Miyo kaamuveleeliwa Owaani n’atthu kamosa kamosa, alopwana n’athiyana wala etthu siiso. Awo yaawaranse ikuwo soottelea.” Vano awo khwira, “Kaari ookhurunuwa murima ni murettele.” Khwira, “Axipalame aalupale ooreera evavasaka mwiri ti mwiri.” Awo khwira, “Muhuupuwele wira kiroovahuwa.” Awo khwira, “Billy, kinimooleelani vavonny’ahu.” Awo khwira, “Mukilaathi.” Miyo khuhikilaathi; kikokhora, kivara ntata naya. Awo khwira, “Moosuwela vari ovonya wahu?”

Nto miyo khwira, “Ayo, kinoophent’akani, koosuwela.”

<sup>218</sup> Awo khwira, “Khivaatthuneya owiwelele Amaama. Athu ale yaahikhalana exariya.”

Nto miyo khwira, “Miyo koosuwela.”

<sup>219</sup> Awo khwira, “Mukimanele natiri ula, wira munoorowa w’atthu ale,” khwira, “okhala wira ale aakhalanasa exariya.” Vano awo khwira, “Mwaalele an’aka siisaale.” Nto miyo... Awo khwira, “Kintthuna kooleleni etthu emosa.” Awo khwira, “Miyo kinookhwa, masi” khwira “ti...miyo nki-nkinoova okhwa.” Khwira, “Ti-ti yooreera.” Awo khwira, “Etthu emosa paahi, ehinkisivela woohiyani, Bill. Ni koosuwela wira mookhalana aana ale aili wira mwaalele.” Awo khwira, “Mukimanele natiri wira-wira khamunihala muhithenle ni wira khamunaahiya an’aka wunuwa pure-pure.” Eyo yaari etthu y’ankhili ya mai a miyakha miloko miili ni mmosa.

Nto miyo khwira, “Nkinwerya woomanelani natiri uwo, Hope.”

<sup>220</sup> Awo khwira, “Koovara metto mukimanele.” Khwira, “Etthu emosa entthun’aka wooleelani.” Khwira, “Munnimuupuwele kapwitthi ule?” Miyo vekeekhai okisivela ikapwitthi. Vano awo khwira, “Nyuwo mwaatthuna omuthuma kapwitthi nihiku nle nave khamwaarina musurukhu woophiyerya wira muhoolihe.”

Miyo khwira. “Ayo.”

221 Awo khwira, “Miyo kaanisuka musurukhu aka, iniikeli saka, wira kihoolihe musurukhu ule wa kapwitthi ule wa nyuwo.” Awo khwira, “Vano, etthu ila yamalaru vano nyuwo khutthikela owaani, nwehe voolilini vootthukula...kiireke voolilini wookhuniwa, vathi va epaphelo ele vasulu, nto munooophwanya musurukhu vaavo.” Awo khwira, “Mukimanele natiri wira munoomuthuma kapwitthi ule.”

222 Nyuwo khamunsuwela moota koonalyaaka okathi woonne aka etoolere ele ni isentavo miloko mithanu na miili (mwa musurukhu wa maluku wa isentavo thanu) ori-ene vale. Miyo khimuthuma kapwitthi ene.

223 Nto awo khwira, “Munnupuwela okathi ule mwaarow’anyu ohitto opooma okithumela imeeya, ni hiyo naarowa oFort Wayne?”

Miyo khwira, “Ayo.”

224 Miyo kaamutthikaru woomiseryani, nto awo khwira... Naahaana orowa oFort Wayne, kaahaana olaleerya ohiy’ule. Nto awo khwira, “Nyuwo moosuwela, miyo khooleelani wira, ‘Sookhala mithinto miili soovirikana.’” Mmosa onihaniwa “chiffon.” Nto mukina aya t’uvi, rayon? Ti yoowo? Rayon ni chiffon. Ahe, mmosa mmosa, chiffon aari ooreerexa. Ti yeeyo? Nto awo khwira, “Vano, mwamuthume chiffon, oophwanela. Nyuwo moosuwela etthu ile erina etthu yaamukhaani ile ottuli wa emeeya, vasulu? Vano miyo nkaasuwela hat’etthu ya imeeya s’athiyana, vano miyo... .

225 Nto miyo kaakhuruwela ephiro kiiraka, “Chiffon, chiffon, chiffon, chiffon,” kitthunaka okhala kuupuwelaka, “chiffon, chiffon, chiffon.”

Mutthu mmosa khwira, “Sai, Billy!”

226 Miyo khwira, “Oh, sai, sai.” “Chiffon, chiffon, chiffon, chiffon, chiffon.”

227 Vano miyo khukompa khikumanana Mwenye Spon. Owo khwira, “Hey, Billy, moosuwela wira makhupa anooluma iwe epantte ele ya nripu nookiserya na eponti?”

Miyo khwira, “Vekeekhai, eyo ekhweelii?”

“Ayo.”

Miyo kuupuwela vano, okathi omuhin’ye aka, “Yaari exeeni etthu ile?” Kooliyala.

228 Vano Thelma Ford, mwali mmosa kaamusuwel’aka, aavaraka mulooxa wa isentavo muloko. Ni kaahisuwela wira awo yaanitumihasa imeeya s’athiyana iwe, vano miyo khurwa weiwo. Miyo khwira, “Sai, Thelma.”

Nto owo khwira, “Sai, Billy. Ehaali anyu? Ehaali ya Hope?”

229 Nto miyo khwira, “Salama.” Miyo khwira, “Thelma, kintthuna imeeya kimuthumele Hope.”

Owo khwira, “Hope khantthuna imeeya sookhuveya.”

Miyo khwira, “Ayo, muthiyana, owo vekeekhai onnitthuna.”

Khwira, “Munihimya imeeya s’athiyana.”

<sup>230</sup> “Oh, vekeekhai,” miyo khwira, “ti yeeyo.” Miyo kuupuwela, “Uh-oh, kihooniherya ohisuwela waka.”

Nto owo khwira, “Muthinto xeeni owo ontthun’awe?”

Miyo kuupuwela, “Oh-oh!” Miyo khwira, “Nyuwo murina muthinto xeeni?”

Owo khwira, “Ahe, hiyo nrina rayon.”

<sup>231</sup> Miyo nkaasuwela evirikanelo aya. Rayon, chiffon, eniwaneyeya vamosaru. Miyo khwira, “Ti seiyo kintthun’aka.” Owo khwira . . . Miyo khwira, “Mukinnye piili, soophwanela.” Nto owo . . . Eyo yoovonyeya. T’ivi? Ya naanaano. “Ya naanaano.” Nto vano miyo khwira, “Mukinnye piili.”

<sup>232</sup> Nto okathi oronw’awe wira okinnye, saakhala isentavo miloko miraru paahi, isentavo miloko miili wala miloko miraru, ntoko nuusu na esisapo aya. Ahe, miyo khwira, “Mukinnye iphaara piili.” Munnona?

<sup>233</sup> Vano miyo khutthikela owaani, nto khwira, “Moosuwela, mwaar’aka, nyuwo mw’axithiyana nyuwo munimweetta mulooxa mothene mpooma wira mphwane esisapo yookhweya.” Moosuwela moota mutthu onimusivel’awe wihimya. Nto miyo khwira, “Masi va, nwehe va, miyo kithumme iphaara piili ni esisapo nyuwo munthum’anyu ephaara emosa. Munnona?” Miyo khwira, “Oh, iwo ti—iwo oratta waka mmansaka.” Moore, miyo khwira—miyo khwira, “Moosuwela, Thelma okitumihenrye iya.” Miyo khwira, “Khino owo orookitumiherya nuusu na esisapo aya.”

Awo khwira, “Mmuthumme chiffon?”

<sup>234</sup> Miyo khwira, “Ayo, muhano.” Sothene iyo saakhala ntoko emosaru wa miyo, nkaasuwela wira saahivirikana.

<sup>235</sup> Nto awo khukiirela, awo khwira, “Billy.” Miyo kaahitikinihiwa okathi awo yaaronw’aya oFort Wayne, awo yaahaana othuma ephaara ekina ya imeeya. Awo khwira, “Miyo kihaavaha ame anyu,” khwira, “iye ti s’athiyana oowuuluvala.” Khwira, “Mukilevelele wira siiso.”

Nto miyo khwira, “Oh, khiva mulattu, mwaar’aka.”

<sup>236</sup> Nto awo khwira, “Vano, muhi—muhikhale muhithenle.” Nto awo khwira . . . Awo khayaasuwela etthu yaarowa wiiraneya iwoora vakhani okhuma vaavale. Vano miyo khuvarela matat’aya ooreera Malaikha a Muluku yaakuxaka.

<sup>237</sup> Miyo khurowa owaani. Nkaasuwela etthu yo wira. Miyo khummaathi iwe ohiyu nto khwiwa . . . kinoona wira naari nikhule naamukhaani, vamatthuwani vaavo waarin’ahu-vo ipaphelo kamosa kamosa. Vano miyo khuwala mukhora ni



nnawo naka, nto vale yaathhomeiwe ekhimooni aya ottuli, (n'awo yaataleliwe ene vathi vale anipwehiwa anoorkhwa). Nto okathi vakhani ookhala aakiihanne, khwira, "Billy!" Vano aari Munna Frank Broy. Owo khwira, "Mwan'inyu onookhwa."

Miyo khwira, "Mwan'aka?"

238 Khwira, "Ayo, Sharon Rose." Khwira, "Tothoro ori vate vale vano, ni ohimnye wira, 'Owo orina menixiiti a elapaha, owo orimwaamwa mw'ame awe.'" Nto khwira, "Owo onookhwa."

239 Miyo kikela mukaaroni, khurowa weiwe. Vano aari vaavale, etthu yaamukhaani yoosivela. Khuroiwiwa voowaakuva oxipiritali.

240 Miyo khikhuma wira kamoone. Sam khurwa khwira, "Billy, muhivolowe ekatthi iyo, muhaana omuupuwela Billy Paul." Khwira, "Owo onookhwa."

Miyo khwira, "Tothoro, miyo—miyo kihaana omoona mwan'aka."

241 Owo khwira, "Nnari, muhivolowe." Khwira, "Owo orina menixiiti, Billy, vano nyuwo mwaamukuxa mwamuravihe Billy Paul."

242 Vano miyo kilipelela mpakha owo okhuma. Miyo nkaawerya ovilela omoona akhwaaka, ni ame awe yaataleliwe ene vale emp'ele ya anaakhwa. Miyo kinimooleelani, ephiro ya namattheka ti yoorika. Nto miyo—miyo khurowa, khuvolowa murima-murima vamukhora, nto okathi Sam okhumme awe ni nfurumeera khikhuma, miyo kikhuruwela vathi. Eyo exipiritalii ekhaani. Owo aari nipuro nimosa meekh'aya, vano iphepele saari mmaithoni mwawe makhaani. Nto awo yaahikhalana ekhaani. . .ele eniihan'ahu "ekhoottiheryo ya ipwilimwithi," wala ntthavi naamukhaani vasulu va maitho awe. Vano owo aani. . .othukumelaka vakhaani, mwetto awe mwaamukhaani wooneneva waamuttikinyeya orowaka vathi n'usulu siiso, ni matata awe makhaani, n'ittettemeri yeele. Nto miyo kimuweha, vano owo aahinnuwa vakhaani voophiyerya otheiha, oophiyaka miyeeri mithanu na miraru.

243 Vano ame awe yaanimpwehaka vate vale owanre ene ikuwo sawe sa ipantte tthaaru, nyuwo moosuwela, vapuwani, okathi waarw'aka. Nto miyo kaanoopa epusina, vano owo ni wira, "gu—gu, gu—gu," akookolelaka miyoono sawe, moosuwela.

244 Nto vale aaphwanyaneya oophentiwa aka, akhwaaka. Miyo khunweha, vano miyo khwira, "Sharry, munnaasuwela Apaapa? Munnaasuwela Apaapa, Sharry?" Nto okathi owo owenh'awe. . . Owo aamuhaawa vanci-ene mpakha nimosa wa maitho awe ale ooreera ooripelela ophurana. Yaahalela okikumiha murima.

245 Miyo kikokhora, khwira, "Pwiya, kiinreni? Nkinlaleerya Ehapar! yooreera mmalothoni? Miyo kinniira sothene sinsuwel'aka wira. Muhikihukhumu ni yeela. Miyo nkinatoko

owiihana atthu ale 'ikokhola.' Yaari awo yaawiihanne atthu ale 'ikokhola.'" Miyo khwira, "Kinnoona othunku sothene iya okhumelela. Mukilevelele. Muhi—muhimukuxe mwan'aka." Nto okathi waalomp'aka, yaakhala ntoko yooriipa...ntoko mukhumi wala ekuwo yaarookhuruwa. Kaahisuwela wira Awo yaahikikhootta.

246 Vano, owo waari okathi woorikexa ni wootakhala wa makhalelo aka. Okathi ovennye aka kimuweha, nto miyo kuupuwela...Satana khuhela mmuruni mwaka, "Ahe, nyuwo munihimya wira wiilipiha wanyu wira mulaleye, ni enamuna enikhal'anyu, nto vano vamphiyerery'aya mwan'inyu, Awo animookhoottani?"

247 Nto miyo khwira, "Ti yeeyo. Awo yaahiwerye omoopola mwan'aka, nto miyo nkinwerya..." Miyo khumaala. Miyo—miyo nkaasuwela yo wira. Nto vo miyo khuhimya ela, miyo khwira, "Pwiya, Nyuwo ti mwaakivanhe vano Nyuwo ti mmukunxe, nttottopeliwe Nsina n'Apwiya! Hata Nyuwo mukikuxaka, miyo nlelo kinimoophentani."

248 Nto miyo kimupweherya ntata naka, miyo khwira, "Muluku ooreeriheni, oophentiwa. Apaapa yaanitthuna woolelani, ni murima aka wothene kaanitthuna woolelani, ni woolelani wira mwaaphenteke Apwiya. Masi Malaikha animoorweelani, oophentiwa. Apaapa anooroiha erutthu anyu yaamukhaani iwe ohela mmatatani mwa Maama. Miyo kinimoovithani vamosa ni yaawo. Nihiku nlo Apaapa animoophwanyasani, nyuwo nwehererye osulu wu ni Maama."

249 Okathi ame awe yaakhw'aya, awo yaahihimya, moolumo ookiserya awo yiirale, awo yiirale, "Bill, mukhale vapuwani."

250 Miyo khwira, "Miyo kino..." Awo khwira...Miyo khwira, "Kakhalaru vapuwani okathi Owo onrw'awe, kinimwaakuxa anamwane nakumane. Kaahikhale, kinoovithiwa vakhiviru ni nyuwo. Vano nyuwo munoorowa moonoo woolopwana wa mukhora muulupale, nto nyuwo mwawoonaru othene aya ovolowa, mweemele vaavo mpacerye okhuwela, 'Bill! Bill! Bill!' voviituperya ntoko sinwery'anyu. Miyo kinimoophwanyani weiwo." Miyo khwaavaha epeeco ya nlahano. Miyo kiri vapuwani v'ekhotto olelo. Eyo yiiraneieye mwa miyakha miloko miili. Koolaihana okumana n'amwaar'aka, kinoorowa okumanana.

251 Nto kimukuxa mwanamwane, okathi okhwiy'awe, kimuhela mmatatani mw'ame awe, vano nimuroiha omahiye. Nto miyo khukhala iwe wira kimwiiwe Munna Smith, mulaleyi mMetotista aalaleiye woovithani, "Ettuurwa mw'ettuurwa, ni ethhaya mw'ethhaya." (Nto miyo kuupuwela, "Murima mwa murima.") Awo aarowa.

252 Voohipisa numala yeeyo, miyo kimuroiha Billy mwaamukhaani weiwe voosisu umosa. Owo aari mwammiravo mwaamukhaani paahi. Owo aari . . .

253 Tivo owo onikivaraxex'awe miyo ni miyo oninvaraxex'aka, kaahaana okhala soopiili Paapa ni Maama (soopiili) wa yoowo. Kaanikuxa esupha awe yaamukhaani. Khinaarina enamuna y'okhalana mooro ohiyu wira nikhaliheke eleethi awe yooviha, nto miyo kaahelaka ottuli waka so n'uvihaha n'uviha w'erutthu aka.

254 Hiyo ninnivaranexa ntoko apatthani, nto nihiku nlo kakhumaru vapuwani kintthuna kimuvarelihe Masu, kiire, "Rowani, Billy. Mukhale ni Yaawo." Atthu akina annitikinihiwa mwaha wa xeeni kinikhal'aka ni yoowo okathi wothene. Nkinwerya omuhiya. Owo hata oothela, masi miyo nlelo kinnuupuwela wira awo yaahikileela, "Mukhale n'uwo." Nto hiyo niniivarana ntoko apatthani.

255 Kinnuupuwela keettaka opooma, esuupha vathi va moonoo aka, owo aanipacerya wunla. Ohiyu umosa owo aari . . . hiyo naamweetta ottuli wa ekintaali weiwo paahi . . . (Okathi yaahalel'aya omuyara, awo yaamuvelavela, nto miyo . . . mwali paahi, nyuwo moosuwela.) Vano miyo kaaneeta kirowaka nno ni nno wa mwiri karvalyo ekintaali ya wiithela. Vano owo khunawunlela Ame awe, ni miyo nkaarina hata Maama wira kimuroihe-wo. Vano miyo kaanimuyaara, kaaniira, "Oh, oophentiwa." Miyo khwira . . .

256 Owo khwira, "Paapa, ari vai amaama? Mwaahenle vathi?"

Miyo khwira, "Nnari, oophentiwa. Awo akumii, awo ari Wirimu."

257 Nto owo khuhimya etthu vo, yaahala okiiva, oxekuwa omosa. Owo aamunla, waahiila makaaripi, nto miyo kaaroomuyaara ottuli waka *siso*, omukuxa vanikhatani vaka ni kimmanaka vakhani *so*. Vano owo khwira, "Paapa, koovara metto murowe mwaarowe Amaama mwaaruhe va,"

Nto miyo khwira, "Oophentiwa, nkinwerya waarowela Amaama. Yesu . . ."

Khwira, "Ahe, mmuleele Yesu akiveleelihe ame aka. Kinnaaphavela."

258 Nto miyo khwira, "Ahe, oophentiwa, miyo . . . miyo ni nyuwo nnoorowa owoona nihiku nlo."

Nto owo khumaala, khwira, "Paapa!"

Nto miyo khwira, "Ayo."

Khwira, "Koowoona Amaama osulu iwe vaneekuni vale."

259 Wulu, aahalela okiiva! Miyo kuupuwela, "Wulu! 'Koowoona Amaama osulu iwe vaneekuni vale.'" Kaahala vakhani ohileya.

Kimupatikha mwammiravo owo vatthirima vaka so, nto kuuramiha muru aka paahi, kivolowa.

<sup>260</sup> Khuvira mahiku. Nkaawerya oliyala. Kaaneererya ovara muteko. Nkaawerya otthikela owaani, khiyaari etthoko tho. Vano miyo kaatthuna ohala. Hiyo khinaarina hat'etthu woohikhala ikaruma iye sookhereyasa, masi yaari etthu awo ni miyo saanisivela vamosa. Yaari etthoko.

<sup>261</sup> Nto kinnuupuwela nihiku nimosa kitthunaka ovara muteko wa kuvernu. Kaaroowela wira kalokiherye efiiyu ya enerexiyya ya nenli ya khalayi, yaathomeiwe, waari oxaka ene voosiisu. Vano miyo khuwela mwiikimanyo ola. (Miyo nkaawerya omuliyala mwaan'ole. Kaaniwerya osuwela ekhwelo y'amwaar'aka, masi okhwa wa mwaan'ole, mwaamukhaani paahi.) Nto kaari vale, kaamwiipa, "Omwaako ottaiwene iwe, waahikhala Mwiikimanyo wa khalayi woowoma." Vano iliinya soopacerya saarowa vathi vatrasmatooreni ni saarowa mpakha (nyuwo moosuwela) sa nenli. Nto miyo kiithomeiye vaavo. Vano khwiiraneya wira kaarooweha, nto nsuwa niphattuwaka ottuli waka. Nto vale, matata aka owookowa nto ekhanyeryo ya Mwiikimanyo ole e—epante ele ya mwaako. Miyo kuupuwela, "Ayo, saari itampi saka saamuhente Owo vale."

<sup>262</sup> Miyo khwira, "Sharon, oophentiwa, Apaapa annitthuna sana owoonani, oophentiwa. Moota kaatthun'aka wookuxani-tho mmatatani mwaka, nyuwo mwaamukhaani ookisivela." Miyo kikhuma mwa miyo. Saahivira isumana. Miyo kirula eluuva aka ya mphira. Sookhala ivolta ikonto piili ni imiya tthaaru sinvira vakhiviru va miyo. Miyo kirula eluuva aka ya mphira. Miyo khwira, "Muluku, ti yookinanara wira ela. Ka namoovaa." "Masi, Sharry, Apaapa anoorowa owoonani nyuwo n'Amaama mwa minutu vakhani paahi." Kipacerya orula eluuva aka, wira kihele ntata naka vavoltani vale ekonto ni imiya tthaaru. Miyo kaamunta... Vano, nnakhala khaamwaarowa okhalana hata ephome mwa nyuwo. Nto siiso miyo—miyo—miyo kipacerya orula eluuva ele, nto yookhala yiiraneieye. Okathi kiitthokelenly'aka, kaakilanthe vathi ni matata aka vasulu siisa sa, owiitho waka, kinlaka. Yaari mahala a Muluku, ahiso nkaarowa wira kikhalanaka muteko wo ovoniha va, miyo nkireerere okupali yeeyo. Aari Owo akhapelelaka yoovaha Awe, kahi miyo.

<sup>263</sup> Kipacerya orowa owaani. Keemela, kipweha ikaruma saka. Khutthika, miyo khwira, "Kinrowa owaani."

<sup>264</sup> Miyo kipacerya orukurerya empa, vano kiphwanya epaphelo ya kureyu owaani, yookhalaka mooriyrya, vano kivolowa. Naahikhalana nipuro naamukhaani, miyo kaarupaka voollilini mwaamukhaani memmo, vano maluku makhaani a xeelo epaceryaka orwa, ni efikawu ile yaamukhaani. Miyo kikuxa

epaphelo eyo ya ekureyu vano kiweha epaphelo ene yeeyo ya ekureyu, nto etthu yoopacerya mwa yeeyo waari musurukhu awe waasukeriwe Natale, isentavo miloko mithanu na miraru, “Mwaamuhano Sharon Rose Branham.” Yaari vale, sothene sitthikaka-tho.

<sup>265</sup> Miyo kaari namweettelela a etakhwa. Kookola moonoo aka kimukuxa kapwitthi aka, epistoola, mmurupani. Miyo khwira, “Pwiya, miyo—miyo nkinwerya ovilela-tho ela, miyo—miyo kinookhwa. Nki—nkireere ohooxeya.” Kivenxa ekwaxulo ottuli w’epistoola, kiipweherya vamuru vaka, kikokhonreene vale voolilini mwaamukhaani vale okatthi iwe wooripelawo. Miyo khwira, “Tith’ihu Muri Wirimu, nivuwihwe Nsina Nanyu. Omwene Anyu orwe, otthuna Wanyu wiireye,” nto okathi kaatthun’aka, ni kitthittaka esyalo ele voolipaxa ntoko saawery’aka, miyo khwira, “siiso vathi va ntoko Wirimu. Munivahe olelo yoly’ahu ya khula nihiku.” Vano khayoopeya!

<sup>266</sup> Nto miyo kuupuwela, “O Muluku, Nyuwo munookikhera paahi kapatti-kapatti? Kiinreni? Nyuwo khamunikihiya hata okhwa.” Vano miyo kirihela epistoola vathi, vano eyo khwiisoopa khumorela okatthi. Miyo khwira, “Muluku, kihinikhwelani kikhuma mw’etthu ila? Miyo nkinwerya orowa ohoolo tho. Nyuwo muhaana okiirela etthu miyo.” Nto khumora khupacerya wunla vale voolilini vaka mwaamukhaani, wa khalayi wooriipa.

<sup>267</sup> Nto kaahaana wira kirumpeene. Nkisuwenle sinto kaahirupa wala exeeni yiiraneieye.

<sup>268</sup> Miyo kweekwe kaaniwehererya vanci-ene okhala epantte Onikhuma nsuwa. Kweekwe kaatthuna ixapheyo iye. Atithi aka yaalemeihaka ikhavaloo ari-ene mahiku aya eemiravo, ni miyo kweekwe kaatthuna ikofiyo iye. Nto Munna Demos Shakarian ookithumela emosa nsana, yoopacerya waka okhalana (kaahinto okhalana) siisaale, emosa wa ikofiyo iye s’epantte onikhuma nsuwa.

<sup>269</sup> Nto miyo koono wira kaarowa kikhuruwelaka munyepu, kiipaka esipo ele, “Nookhala nttheke vakarosani ninteiye, ethoonyeryo omatta, ‘Ninnitumihiwa.’” Nto okathi waarow’aka, kaahoona ekarosa ya khalayi yookhuneeliwa, ntoko ekarosa ya khalayi ya mmunyepuni, nave nttheke naya naahinteya. Vekeekhai, nle nooniherya etthoko aka yoohononeya. Vano vaattamenly’aka, kiweha, nto vale eemenle mwa—mwali, ooreera sana, oophiyaka miyakha miloko miili, ikharari soottelela ni soorekama ni maitho ooripelela, owanreere ikuwo soottelela. Miyo kimuweha, miyo khwira, “Ehaali anyu?” Khurowa.

Owo khwira, “Sai, Paapa.”

<sup>270</sup> Vano miyo khirukunuwa, miyo khwira, “Paapa?” “Vano,” miyo khwira, “sai, Mwaamuthiyana, nyuwo munniwerya... vanniweryaneya miyo okhala apap’inyu nyuwo murineene miyakha ntoko sirin’aka?”

271 Owo khwira, “Paapa, nyuwo vekeekhai khamunsuwela vatthu vari-anyu.”

Nto miyo khwira, “Munihimya exeeni?”

272 Owo khwira, “Ela Erimuu.” Khwira, “Elapo ya vathi kaari Sharon anyu mwaamukhaani.”

“Vano,” miyo khwira, “oophentiwa, nyuwo mwaari mwanamwane mwaamukhaani paahi.”

273 Khwira, “Paapa, anamwane axikhaani kahiyo anamwane axikhaani nno, awo khanookhwa. Awo khanuuluvalasa wala khaninnuwasa.”

274 Nto miyo khwira, “Ahe, Sharon, oophentiwa, nyuwo—nyuwo mwa mwali, ooreera.”

Owo khwira, “Amaama animoowehereryani.”

Nto miyo khwira, “Vai?”

Owo khwira, “Osulu etthoko anyu esya.”

275 Nto miyo khwira, “Etthoko esya?” Nloko na aBranham anaweettasa pure, awo kharinasa itthoko, awo paahi. . . Nto miyo khwira, “Ahe, nkinakhalaneke etthoko, oophentiwa.”

276 Owo khwira, “Masi mookhalana emosa osulu nno, Paapa.” Nkinihimya ntoko mwaana, masi eyo ti yekeekhai wa miyo. [Munna Branham onimunla—Mol.] Kapacerya wuupuwela eyo, sothene sinootthika tho. Khwira, “Mookhalana emosa nno, Paapa.” Koosuwela wira kihaana emosa iwe, nihiku nlo kinorowa-wo. Owo khwira, “Ori vai Billy Paul, murokor’aka?”

277 Nto miyo khwira, “Ahe, kimuhin’ye wa Muhano Broy, minuto vakhaani sivinre.”

Khwira, “Amaama annitthuna owoonani.”

278 Nto kirukunuwa kiweha, nto saahikhala ipa suulupale sana, vano Ovuwa wa Muluku owelaka seiyo. Vano kaahiiwa nikhuru na Malaikha niipaka, “Etthoko Aka, Etthoko yooreera.” Kipacerya owela exikatta yooekama, kitthimakaka vowaakuva ntoko saawery’aka. Nto vaphiyaly’aka vamukhora, awo yeemenle vaavo, ewanreene ekuwo yootteela, ikharari iye sooriipa, soorekama, sikhuruwenleene ottuli waya. Awo khuvenxa miyoono saya, ntoko kweekwe siirak’aya okathi waaphiyaaka owaani kikhulumunwe ene kikhumaka omutekoni wala etthu siiso. Khwaavara matata aya, nto miyo khwira, “Oophentiwa, koomona Sharon vathi vale.” Miyo khwira, “Owo mwali ooreera, kahiyo?”

279 Awo khwira, “Ayo, Bill.” Awo khwira, “Bill.” Kukipweherya miyoono saya, (nto awo khwira) ahenleene mmakhatani mwaka paahi, awo khupacerya okivaravara, awo khwira, “Muhiye oxanka mwaha miyo ni Sharon.”

Miyo khwira, “Oophentiwa, nkinwerya ohixanka.”

280 Awo khwira, “Vano Sharon ni miyo nri sana woovikanani nyuwo.” Nto khwira, “Muhixanke-tho mwaha wa hiyo. Munookimanela natiri?”

281 Nto miyo khwira, “Hope,” miyo khwira, “Munnikinkhela vanci-ene nyuwo ni Sharon, ni Billy onoowunlelani okathi wothene.” Miyo khwira, “Miyo nkinsuwela y’omwiiriha.”

282 Nto awo khwira, “Sothene sinookhala sana, Bill.” Awo khwira, “Mukimanele natiri paahi wira khamunrowa-tho oxanka.” Nto awo khwira, “Khamunkilaathi?” Vano miyo kiwehaweha nto yaahikhala ekhatera yuulupale.

283 Ni miyo kinnuupuwela wira kaahitthuna othuma ekhatera. Vano, kimalihaka. Kaahitthuna othuma ekhatera okathi uwo. Hiyo naarina paahi iye sa ikha—ikhatera iye pure sa khalayi sa miri sa nipuro onaapeiwa. Hiyo naahaana orumeela seiyo, ikhatera sene naarin’ahu. Ni naahiwerya othuma ikhatera iya nyuwo munipurulel’anyu ottuli, ntoko e . . . Kinooliyala ekhatera ene y’omumula-vo. Ni eyo yaakhwiye itoolare muloko ni thanu na piili, vano vaaniweryaneya ohooliha itoolare tthaaru ni etoolare emosa khula esumana. Vano hiyo naahithuma emosa. Nto, oh, okathi waaphiy’aka . . . Kaanivara muteko nihiku nothene, n’ulaleya mpakha ohiyu eriyari mmuttettheni ni nipuro pi nipuro kaawery’aka olaleya.

284 Nto—nto nihiku nimosa khupisa oliva. Khanaawerya wira, nto nihiku ti nihiku khuvira, nto vookiserya nihiku nimosa awo khurwaasa khikuxa ekhater’aka khuroihasa. Ohiy’ule, nkinkhalakhala kiliyalaka, awo yaahikooxerya etoorta ya serexa. Oowooniha othunku, awo—awo—awo yaahisuwela wira kaamukhala oohiphura etthu. Nto numala olya ohiyu miyo khwira, “Mukhalenleni ooreera murima ohiy’ula, oophentiwa?”

285 Nto awo khwira, “Nwehe, miyo kihaavekela amiravo ale wa anamaitthoko wira yoothipeleni inyakwata. Khamunoona wira naahaana okhuruwela omuratthini namiserye okathi vakhani?”

Nto miyo khwira, “Ayo, masi . . .”

286 Nto awo khupacerya wunla. Kaahisuwela wira yaahikhala etthu yaahaalonke. Kaahikhalana muupuwelo mmosa ’okhala wira awo yaahikiveleelihasa muhupi wira yaamoorwa okuxa. Ni hiyo khinaawerya oliva etoolare ele emosa khula esumana. Khinaawerya, khanaarina . . . khinaarina enamuna yo wira. Awo khukupatikha, vano kirowa vamukhora nto ekhater’aka yaahirowa.

Awo khukileela osulu Iwe, awo khwira, “Munnuupuwela ekhatera yeele, Bill?”

Nto miyo khwira, “Ayo, oophentiwa, kinnuupuwela.”

Khwira, “Ti yeeyo mwaatthokelel’anyu, khiyaari yeeyo?”

“Ayo.”

287 Khwira, “Ahe, awo khankuxa ela, ela yooliviwa.” Awo khwira, “Mukilaathi minutu mmosa paahi, kintthuna olavula ni nyuwo.”

Nto miyo khwira, “Oophentiwa, miyo nkinwerya osuwela sana ela.”

288 Nto awo khwira, “Mukimanele natiri, Billy, mukimanele natiri wira khamunrowa-tho oxanka. Munootthika vano.” Ni khwira, “Mukimanele natiri wira khamunrowa oxanka.”

Nto miyo khwira, “Nkinwerya wira eyo, Hope.”

289 Nto okathi ene yoole nto kitthikela wa miyo, waahiriipela okatthi. Miyo kiwehaweha, khoona ntoko moonoo aya okhala mwa miyo. Miyo khwira, “Hope, muri wenna okatthi?”

290 Awo khupacerya okivaravara. Awo khwira, “Munookimanela natiri uwo, Bill? Mukimanele natiri wira khamunthela. . . khamunxaka-tho.”

Miyo khwira, “Kinnoomanelani.”

291 Nto okathi awo akivaravanre aya imara piili wala tthaaru, vano awo khulakaseya. Miyo kitupha kimupattiha luuxu, kiweha mapuro othene, awo yaahilakaseya. Masi awo yaalakaseiye okatthi paahi. Awo khalakaseiye, awo nlelo akumii. Awo yaari muKristu.

292 Billy ni miyo naahirowa vamahiye va okathi vakhani ovinre, nikunxeene nluwa naamukhaani w’ame awe ni murokor’awe, voosiisu umosa wa Pasika, vano hiyo khweemela. Mwammiravo khupacerya wunla, owo khwira, “Paapa, ame aka ari vathi vale.”

293 Miyo khwira, “Nnari, oophentiwa. Nnari, awo khakhanle vathi vale. Murokor’inyu khokhanle vathi vale. Hiyo nrina nihiye noowaliwa va, masi ottaiwene epantte ekina y’ephareya nookhala nihiye noohuliwa weiwo Yesu ohihimunw’awe. Nto nihiku nlo Owo onimoorwa, Owo onnomuruuha Murokor’inyu ni Maama ni Yoowo.”

294 Miyo kiri vapuwani v’ekhotto olelo, apatthani. Miyo—miyo nkinwerya ohimya-tho hat’etthu. Miyo. . . [Munna Branham onimunla—Mol.] Muluku ooreeriheni. Nrowe nuuramihe miru sahu minutu mmosa.

295 O Pwiya! Imara sinci-ene, Pwiya, miyo kookupali wira atthu khansuwela sana, okathi awo anuupuwel’aya wira itthu iya sinrwa vookhweya. Masi nookhala nihiku nimosu nuulupale nnoorwa okathi Yesu onrow’awe orwa ni mixankiho iya sothene sinrow’aya okukutthiwa. Miyo kinnivekela, Tithi a Wirimu, wira Nyuwo munikhaliherye wira nikhale oolikana.

296 Ni natiri ule ookiserya, okathi kaapecanry’aka vanlakuni voosiis’ule, wira kaamurowa okumana n’awo iwe nihiku nle. Miyo kookupali wira awo anrowa okhala yeemenle ene vanripuni vale, yiihanaka nsina naka. Miyo kinnikhala oororomeleya ni



natiri ule okhuma vaavale, Pwiya, mulaponi mothene, mapuro a khula enamuna, kiilipihaka wira kiruuhe Ehapari yooereera. Kuuluvalaka vano, ni oowoceya, koomalamala. Nihiku nlo nimosa kinoorowa omukhuneela Bibilia ola emara yookiserya. Vano, Muluku, mukikhalihe oororomeleya ni natiri. Mukhalihe mahala Anyu mwa miyo, Pwiya. Muhikihiye kiwehaka itthu sa makhalelo ala, masi kikhaleke wa itthu siri ohoolo. Mukikhaliherye okhala naxariya. Nkinvekela ephareya ya maluwa ooreera, nnari, Pwiya, okathi Kristu aka okhwiw'awe iwe moohaawani. Nto akina aya othene akhwiye siiso. Miyo nkinvekela hat'etthu eri yookhweya. Mukihiye paahi kikhale naxariya, Pwiya, eekeekhai. Mwahiye atthu ekiphente wira kaaruhe wa Nyuwo. Nto nihiku nimosa sothene simanle ene ni hiyo nithukumanne ene vamosa vathi va miri pinyeero, kintthuna kaavarele ntata kaaroihe, kawoonihe atthu a Empa Angelus ni othene akina. Onrowa okhala okathi muulupale nto.

<sup>297</sup> Kinvekela wira omoriwa Wanyu ikharari okhale mwa khula mmosa a hiyo va. N'ale ari vaava, Pwiya, hata ahinoosuwelani. Nto khino arina oophentiwa aya mwaamukhaani epantte ekina y'ephareya. Vakhala wira awo khamammaliheryeke natiri aya, awo yiire vano, Pwiya.

<sup>298</sup> Nrineene miru sahu sowuurama, kaatthuna kisuwele mwa muthukuman'ola muulupale oxekuw'ola, akavi a nyuwo aniira "Munna Branham, kintthuna kikumane n'ale onaaphent'aka, nave. Miyo—miyo—kookhalana atthu onaaphent'aka ari epantte ekina ya muro iwe"? Khino nyuwo moommana natiri wira mwaamurowa okumana ni yaawo, khino okathi mwaawiireny'anyu Amaama "koorowa" omahiye iwe nihiku nle, khino okathi mwaamuhimenry'anyu Mwaamurokor'inyu "koorowa" wala Atiith'inyu, wala mmosa a awo vamahiye, mwaahihimya wira mwaamukumanana, nto nyuwo—nyuwo khamunaitthokihe nlelo. Nyuwo khamunuupuwela wira ola okathi wooreera vano wo wira yeeyo?

<sup>299</sup> Mukilevelele wunla waka. Masi, oh, wulu, nyuwo khamunsuwela, axipatthani. Nyuwo khamunsuwela wii—wiivahererya xeeni! Eyo epantte, yaamukhaani, ya wahala a makhalelo aka.

<sup>300</sup> Akavi a nyuwo yaatthuna ovenya vano n'urwa nno wira evekele, wira, "Kintthuna kikumane n'ale onaaphent'aka"? Nvenye vamuthukumanoni murwe nno. Munimwiira? Akhala mutthu ohinatoko wiitthokiha nlelo. Muluku ooreeriheni, mulopwana. Kinnimoona mulopwana mmosa mutokweene ooriipa orwaaka, akina erwaaka. Mwiittikinye, nyuwo muri mpithela osulu iwo, mweette paahi mulukamaka munvireloni. Ahiso nvenye, nyuwo munthuna wuupuweliwa mwa nuulumo na mavekelo naanaano va. Ti yeeyo. Nvenye pahi mweemele. Ti yooereera. Nvenye, mapuro othene, nyuwo mwaarowa wira, "Kookhalana atithi aka ottai iwe, kookhalana amaama wala

mutthu onimphent'aka ottai iwe. Kintthuna kirowe kawoonase. Kintthuna kikumane ni yaawo ni murettele." Munoovenya, mweemele paahi, mapuro othene vamuthukumanoni. Nvenye mweemele, mwiire, "Kintthuna kikupali."

<sup>301</sup> Muluku ooreeriheni, muhano. Muluku ooreeriheni ottuli iwo. Ni ooreeriheni nyuwo ottuli iwo. Apwiya yooreeriheni nyuwo va, mulopwana. Ti yeeyo. Osulu mpithela, Apwiya yooreeriheni. Mapuro othene, mapuro othene, nvenye mweemele vano wira mukhalane nuulumo na mavekelo, okathi Eroho Yowarya eriya vaava ni yeettaka vamurimani vahu, wira—wira—wira enoolowihe murima.

<sup>302</sup> Nyuwo moosuwela, etthu ekereja entthun'aya olelo woolowihiwa murima. Ennitthuna okhuruwela Owanny'awe Mulipa-oowuupa. Teologia ahu oolipa oopakiwa owaani imara sikina khonivara etthu sana. Etthu entthun'ahu wooloihiwa murima wa enamuna ya khalayi, orukunxa murima mmurimani mwahu, nikhhalaka oowoolowaseya ohoolo wa Muluku. Awo t'othene ale alikanne wira evenye?

Nrowe nuuramihe miru sahu nto wira nivekele.

<sup>303</sup> O Pwiya, Yoole omurunhe-tho Yesu wa a...okhuma w'alipa-okhwa, wira anikhalihe anaxariya othene ahu mwa waamini, naaminiki. Miyo kinvekela, Pwiya, wira ala avennyeno vano yeemela wira yookupalini Nyuwo, kinvekela wira oleveleliwa okhale wa yaawo. Nto, O Pwiya, miyo kinvekela wira awo yookupalini Nyuwo ntoko Moopoli aya ni Mwene ni Namaphenta, nto khino awo aakhalana amaama wala apaapa wala mutthu paahi epantte ekina y'ephareya. Yookhala etthu y'ekeekhai, awo aakhalana Moopoli. Awo eleveleliwe itampi saya, ni sootheka saya sothene sittipihawe, wira minepa saya sirapihiwe mwa Ephome ya Mwaapwittipwitthi, ni wira ekhaleke ni murettele okhuma vano mpakha ohoolo.

<sup>304</sup> Nto nihiku nimosa noovuwa simanleene sothene, wira hiyo nithukumane Owanny'Inyu, ni nikhale weiwo ntoko amusi oomalela, wira nikumane n'ale onaaphent'ahu anwehererya epantte ekina. Ela, hiyo nnaavahererya wa Nyuwo, wira "Nyuwo munoomukhalaha mwa murettele woomalela ole murim'awe onlipa mwa Yoowo." Munivahe, Pwiya, okathi onaavaherery'ahu awo wa Nyuwo. Mwa Nsina na Mwan'Inyu, Pwiya Yesu. Amen.

<sup>305</sup> Muluku ooreeriheni. Kookupali wira anamuteko annoona vatthu mweemenly'anyu, nto awo anookhala ni nyuwo mwa minutu vakhani.

<sup>306</sup> Nto vano w'ale anrowa waakhela ittikitti sa mavekelo. Billy, ori vai Gene ni Leo, arisa ottuli? Awo arisa va wira ekawase ittikitti sa mavekelo mwa minutu vakhani paahi. Munna onoolaiha muthukumano ni mavekelo, nto ittikitti sa mavekelo sinookaiwa. Nnoothikela vaava okathi vakhani paahi, wira naavekelele aretta. Vaareera, munna.



*WAHALA A MAKHALELO AKA* EMK59-0419A  
(My Life Story)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku oxekuwa, mahiku yettaka 19 mweri wa Abril, 1959, Empa Angelus oLos Angeles, California, w'Amerika, okuxiwe wookaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recording

EMAKHUWA

©2019 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)